



**KI NONGHIKAI
BAD KA SKUL PYNPAW**



REV. IARINGTON KHARKONGNGOR

REFERENCE
Not to be Lent out

KI NONGHIKAI
BAD KA SKUL PYNPAW



Rev IARINGTON KHARKONGNGOR

Pastor in-charge,
Sadew --Mawkriah Sub-district

First Edition

*La pynmih da ka Sadew--Mawkriah Sub-district bad la
shon ha* **Ri Khasi Press, Shillong**

—1975—

**Library k - "I pho you Jay for Long
If handled carefully with clean hands.**

REFERENCE

Not to be Lent out

SHIKYNTIEN

Shi snem hadien ba nga la trei kum u Probationary Pastor ha ka Myllem-Laitlyngkot Sub-district nga shem ba ka jingpyniaid ia ka Skul Pynpaw ha ki Balang hapoh la ka Sub-district bad ha kiwei pat ki Balang hapoh ka Synod jong ngi ki long kiba kynrum-kynram. Tang hapoh ka Sub-district kaba nga trei ka don ka jingiapher ha ka rukom pyniaid Skul Pynpaw na kawei ka Balang sha kawei pat. Haba nga la ioh-i ia kane la pynkhih ia ka jynghmut jong nga ban thoh kawei ka kot kaba iadei beit tang na ka bynta ka jingpyniaid ia ka Skul Pynpaw. Bad haba nga la pyrkhat shaphang kane ka kot nga la shitom jynghmut ba ha kano ka dur ngan thoh bad kiei ki bynta kiba donkam eh bad kiba iadei bad ka Skul Pynpaw jong ngi. Khnang ba ngan lah ban ioh ia ka dur jong ka kot, nga la pynkhih ia ka Myllem-Laitlyngkot Sub-district ban pynlong ka Sunday School Teachers Training Class hapoh la ka Sub-district. Kane ka Sub-district, da ka mynsiem kaba shit rhem, ka la lah ban pynlong haduh saw sngi lynter ia katei ka Class. Ki nongpule (trainees) na ka Sub-district kiba iawan sha kane ka Class ki long kumba 80 ngut na ka 100 manla ka sngi. Ngi sdang ia ka Class naduh 10 baje mynstep haduh 5 baje janmiet. Ha ka shi sngi ngi ioh 5 Class --shi kynta kawei-kawei ka Class. Haba ioh-i ia ka jingwan tista bad ryntih ki nongpule ka ai mynsiem ia ki nonghikai (Rev. I. Kharkongngor, Mr. T. Warjri, Mr. B. M. Rodborne, bad Mr. I. Dkhar) bad ka pynlong ia ki ban shit rhem ha ka jinghikai na ka bynta ban iarap lem ia ka Sub-district. Nalor kata, kane ka training ka la nang ai mynsiem shuh-shuh ia nga ban thoh syndon da ka **Kot Iarap** na ka bynta ki nonghikai Skul Pynpaw ha la ka jong ka Sub-district. Ha kaba nyngkong, nga la pyrkhat ban thoh ia kane ka kot na kaei kaba la lum ha katei ka Class, kumba la ai jynghmut da ka Sub-district, hynrei haba nga pule ia ki jynghthoh baroh nga shem ba kim biang satia ban pynlong kot. Hadien ba nga la pule na kiwei pat ki kot Sunday School bad ryngkat bad ka jinghikai kaba nga ioh na College bad ka experience ha ki Balang ha la ka jong ka Pastorate nga la lah ban thoh ia kane ka kot kumba ka long.

Ar snem hadien katei ka Training Class, namar ka jingroi jong ka kam, la ibit ban phiah noh ia ka Myllem—Laitlyngkot Sub-district ha ki ar tylli ki Sub-district—ka Myllem—Laitlyngkot Sub-district bad ka Sadew—Mawkriah Sub-district. Namar nga shong ha Sadew kumta la shah ia nga ban trei ha ka Sadew—Mawkriah Sub-district.

Kumba ha ka ryta ki khynnah ka don ka jingiasnoh kawei hadien kawei pat kumta ruh ka don ka jingiasnoh ha kane ka jyingthoh kawei hadien kawei pat. Haba thoh shaphang ki khynnah Infants, ym lah ban pyniakhlad bak-ly-bak bad ki khynnah Primary; kumjuh haba thoh ia ki khynnah Junior, la hap ban pyrkhat de ia ki khynnah Intermediate—kumta ka don ka jingiasoh kawei hadien kawei pat. Haba thoh ia ka **Psychology**, ka **method**, bad ka **lesson preparation** ka don ka jingiadei kawei bad kawei pat ka klas—para bamarjan klas. Namar kata, nga kyntu ia ki nongpule baroh ban pule lyngba ia ka kot kumta ba kin lah ban sngewthuh bha ia ka jinglong bad jingdonkam ki khynnah ha ki ryta kiba iapher bad ba kin sngewthuh kumno ban hikai ia ki.

Ha kaba wai noh, kane ka kot kaba nga thoh **‘Ki Nonghikai bad ka Skul Pynpaw’** ka long ban shu mait lynti ia ki bynta kiba donkam eh ha kaba pyniaid ia ka Skul Pynpaw. Lehse, ha kaba thoh ia kane ka kot nga lah ban don shibun ki jingklet bad jingduna hangne-hangtai. Ngan sngewnguh shi-katdei ia kito kiba sngewbha ban iapyn-i lem ia kita kiei-kiei bad ngan pyrkshang ruh ban pyntrei kam ia ki jingai-jyngmut jong ki.

Iarington Kharkongngor

I 'TIEN KHMAT

Da I. Mr. T. Warjri, I.S.S.U. Diploma.

‘KI NONGHIKAI BAD KA SKULPYNPAW’

Da I Rev. I. Kharkongor B.A., B.D.

I Rev. Kharkongor i la long u saiñ pyniar ia ka Khasi Literature. I la thoh shibun ki kot ki sla kiba iadei bad ka General Literature. Ka Literature ka long kum ka umpohliw jong ka jingnang jingstad ba ki samla Khasi Jaiñtia jong kane ka Ri Lum ba ieit jong ngi kin ioh ban dih na ka.

I la thoh sa ia kane ka Kot —‘KI NONGHIKAI BAD KA SKULPYNPAW’. Nga la pule ia ka, nga iohi ba ka long ka kot kaba donkam na ka bynta :—

1. Ki Nonghikai ha ki Skulpynpaw ha kane ka Ri jong ngi. Ka Skulpynpaw ka long kawei na ki Institution kaba kyrpang jong ka Balang ban ai jinghikai ia ki khynnah, ki samla bad kiba la san. Nga ngeit ba kane ka jinglamkhmat ha kane ka Kot ba la ruid laiñ ia ki jingshisha kiba iadei bad ki jinglong, ki jingdonkam, ki jingsngew, ki jingkwah bad ki jingangnud ki nongpule kan iarap shibun ia ki Nonghikai Skulpynpaw ha ki Balang.

2. Ha kane ka Kot la bsuh ruh ia ki jingmut kiba iadei bad ki iing Khristan, ba kumno ki kmie ki kpa kin pyniadei ia iade bad la ki khun ha ki karta bad ki kyrdan kiba iapher. Kan long ka jingkyrkhu ia ki kmie ki kpa ban pule ia kane ka Kot, khnang ba ki lah ban ioh jinghikai bad weng ia ki katto-katne ki jingeh ba ki iashem ha ka jingiadei bad la ki khun ha iing,

3. Kane ka kot kan long ruh ka jingiarap ia ki nonghiha ki Skul-Pule ha kane ka ri, namar ha kane ka kot la ruid dur ruh ia kajuh ka jingmut kumno ban hikai ia ki khynnah bad ia ki samla. Ka ktien ‘Education’ ka mut ruh ban tei ia u briew baroh uwei, kata, ia ka met, ka jingmut jingpyrkhat, ia ka jinglong jingim babha bad ia ka jingim kaba iadei bad ka malade, bad la ki para briew bad khamtam ha ka jingiadei bad U Blei kumno ban mane bad shakri ia U.

Khublei shibun.

KI JYNGKHUNG

Katto-katne shaphang u Robert Raikes—Mr. T. Warjri

I KA JINGLONG (PSYCHOLOGY)

Ka jinglong bad jingdonkam ki Khynnah rit (Infants):

- i Ki long kiba khih
- ii Ki shkor bad ki khmat ki thait kloi
- iii Ka met ka phad jong ki ka dang lung
- iv Kiba wad jingtip da kaba buh jingkylli
- v Kiba shna ei-ei
- vi Kiba lum ei-ei
- vii Kiba pyrthuh bud
- viii Kiba khlaiñ ban mut dur
- ix Kiba pyrkhat ia lade
- x Kiba dap da ka jingsngewphylla suda
- xi Kiba kohnguh
- xii Kiba shaniah ha kiwei pat
- xiii Kiba sngewtynnat ia ki jingiathuhkhana kiba jem

Ka jinglong bad jingdonkam ki Khynnah pdeng (Primary):

- i Kiba pynpaw ia lade
- ii Kiba ialum kynhun
- iii Kiba ieit ban rwai
- iv Kiba smat palat
- v Kiba pyrkhat tang na sla

Ka jinglong bad jingdonkam ki Khynnah heh (Junior) :

- i Kiba kwah ia ka jingshisha
- ii Kiba sngewtynnat ban trei da ki kti
- iii Kiba sngewtynnat ban don ha ka kynhun
- iv Kiba khlaiñ eh ka jingkynmaw
- v Kiba sngewthuh ia ka jyngkit-khlieh
- vi Kiba kwah ban pule kot

Ka jinglong bad jingdonkam ki Samla dang khie (Intermediate)

- i Ka jingkylla ha ka jingsan ki dkhoh met (physical change)
- ii Ka jingkylla ha ka bor pyrkhoh (mental change)
- iii Ka jingkylla ha ka imlang-sahlang (social change)
- iv K1 bym lah ban shah ia ka jingwoh nia
- v Kiba sngew-artatien ia la ka jong ka jingngoit
- vi Kiba pyrkhoh shaphang ka kam shongkha-shongman

II KA RUKOM HIKAI (METHOD)

Ka jingiathuhkhana

Kiei ki rukom hikai ia ki Khynnah rit (Infants) bad Khynnah pdeng (Primary) ?

- 1 Ka jingiathuhkhana (story-method)
- 2 Ka jingiathuhkhana kaba kumno ?
- 3 K1 kyntien ba ngi ju pyndonkam
- 4 Ka sur kren
- 5 K1 jingleh (actions)
- 6 K1 tiar trei (visual aids)
- 7 Kaba kylli jingkylli bad jubab
- 8 Kaba iakien lang
- 9 Ka jingpyntrei kam

Kiei ki rukom hikai ia ki Khynnah heh (Junior) ?

Ka jingpyndonkam ia ka Baibl
K1 rukom hikai

Kiei ki rukom hikai ia ki Samla dang khie (Intermediate) :

- 1 Ka jingiaphylliew jingmut
- 2 Da kaba iathuh khana
- 3 Ka jinglong dkhoh bapura ha ka Balang
- 4 Ka jingpynlong lok bad kiwei pat
- 5 Ka jinglong jingim kum ka nuksa
- 6 Ka jingjop ia ki para-mynsiem
- 7 Ka kam nongialam

III KA JINGPYNKHREH IA KA LYNNONG (LESSON PREPARATION)

Ki nongrim haba pynkhreh ia ka lynnong :

Ki nongrim haba pynkhreh ia ka lynnong .

- 1 Ka jingduwai
- 2 Ka Baibl
- 3 Ka por
- 4 Ka jaka
- 5 Ka jingthmu
- 6 Ka jingpynleit jingmut

Ha kano ka rukom yn pynkhreh ia ka lynnong na ka bynta ki Khyannah rit ?

- 1 Pule bniah ia kane ka bynta ha ka Baibl
- 2 Ki kot iarap
- 3 Ka jingthmu
- 4 Ka jingsdang
- 5 Ka met-bah
- 6 Ka jingkiew khet (climax)
- 7 Ka jingpyntrei kam

Ka jingpynkhreh ia ka lynnong na ka bynta ki Khyannah pdeng

- 1 Ka kot lyngkdop na ka bynta ban thoh ia ki bynta ha ka Baibl
2. Ka kyrpong (background)
3. Ka jingthmu
4. Ka jingpynleit jingmut (meditation)
- 5 Ka dur jong ka jingiathuhkhana (story-scene)
- 6 Ki dur
- 7 Paragraph
- 8 Thoh ka sentence ban pynkut ia ka jingiathuhkhana
9. Jied kyrteng na ka bynta katei ka jingiathuhkhana
- 10 Ka jingpyntrei kam
- 11 Ka tiar trei

Ka jingpynkhreh ia ka lynnong na ka bynta ki Khyannah heh (Junior)

- 1 Ka kot lyngkdop na ka bynta ban thoh ia ki bynta kiba donkam ha ka Baibl
- 2 Ka kyrpong
- 3 Ka jingthmu
- 4 Ka jingpynleit jyngmut
- 5 Ka dur jong ka jingiathuhkhana
- 6 Ki dur
- 7 Paragraph
- 8 Thoh ka sentence ban pynkut ia ka jingiathuhkhana
- 9 Jied kyrteng na ka bynta katei ka jingiathuhkhana
- 10 Ka jingpyntrei kam

Ka jingpynkhreh ia ka lynnong na ka bynta ki Samla dang khie (Intermediate)

- 1 Ka jinglamphrang
- 2 Ka jingiaphylliew jyngmut
- 3 Ka jingthmu
- 4 Ka jingpynleit jyngmut

IV KA JINGSENG NE KA JINGPYNBEIT RYNTIH IA KA KLAS (ORGANISATION)

- Ka jingbuh kyrdan
- Ka jingheh jong ki klas
- Ka kyrdan khyllung (the Cradle Roll)
- Ka kyrdan Khyannah rit (Infants)
- Ka kyrdan Khyannah pdeng (Primary)
- Ka kyrdan Khyannah heh (Junior)
- Ka kyrdan Samla dang khie (Intermediate)
- Ka kyrdan kat kum ka ryta

V KI NONGKIT KAM BAD KI COMMITTEE

Ka rukom jied bad ka por trei jong ki nongkit kam

Ka rukom jied ia ki dkhot ha ki Committee

U Superintendent

U Secretary

U Treasurer

U Librarian

U Leader ha ki department

Ki Nonghikai

VI KA JINGIASENG KYRPANG KA SKUL PYNPAW HA LA KA JONG KA KLAS

Khynnah iit

Khynnah pdeng

Khynnah heh

Samla dang khie

Katto-katnc shaphang u Robert Raikes

Da I Mr T Warjri, ISSU, Mawkhar, Shillong.

U Robert Raikes u dei u Nongseng ia ka Skulpyn-paw ha ka pyrthei La kha ia u ha ka shnong Gloucester, England, ha ka snem 1735 Une naduh ba u dang khynnah u long uba sngui jinglong ha ka jingia-dei bad ki briew baroh bad U Blei

U Kpa jong u u la long u Nongthoh-kotkhubor (Editor) jong kawci ka kot-khubor niam kaba kyrteng Ka Gloucester Journal Hynrei u kpa jong u u la iap noh ha ka snem 1757, ha kaba u Robert Raikes un shum noh halade ia kane ka kam Editor ia kane ka Kot-khubor Da kane u la ioh lad shibun ban thoh, ban kren ia ki briew jong kata ka shnong shaphang ka jinglong jingim jong ki briew kiba long khristan ha ka jingia-dei jong ki bad U Khrist U la thoh ruh ia ka jingsniew bad ia ki jinglong ba sniew jong ki riwdum, ba kin ioh ia ka hok ka jingkhuid bad ka jingshisha ha ka jingia-dei bad U Blei Bun ki riwsniew ki la thut hynrei u la ianch ha la ka kam khlem kylla dien.

U Robert Raikes u la iohsngew ia ka jingkhot jong U Blei ban tci wat sha iingbyndi ruh U la leit ban ai jingbam ai jaiñ ai nep ia ki koidi Da kaba u leh kumne u ioh 'ad ban hikar ia ka Ktien U Blei ha ki U la kien baroboi ia ka jingieit bah jong U Blei ia ki nongpop da U Ihsu Khrist Bun ki koidi ki iaiam bad ki kylla kaba mut

Mynshua h' ka por u Robert Raikes ki la don shisha ki Skulpynpaw hynrei kim da iaid ryntih bha Te u la iohi ba dei ban sdang noh ia kane ka kam, u la iohi ba ha ka shnong Gloucester ki don bun ki khynnah kiba shu ieng kai ha surok, sharud lynti bad kiba ialehku kynhun-kynhun ha ki jaka baroh. U la lum ia ki bad u la hikar ia ka Ktien U Blei U la h'ku ruh ia ki jingkheñ bad kiwei ki subject ki ban tei ia ka jingim kiba iadei bad ka jingim jong ki.

Ha ka snem 1780, u la sdang syndon ban seng ia ka Skul-pynpaw. U la khot ia ki samla ban long ki nonghikai ki ban hikai ia ki khynnah. U la ia trei-lem bad ki nonghikai ban shna ia ka jingim jong ki khynnah. Ha kane ka dur u la pynbynta ia ki Klas kiba ia pher kat kum ka karta ba ia jan jong ki khynnah. Kane ka jingtrei jong U Robert Raikes ka la nangiaid, kylleng-kylleng ki jaka haduh ka snem 1789 kata, khyn-dai snem hadien ba la pynlong ia ka Skulpynpaw ki khynnah kiba wan tista ki long kumba lai lak ei-ei.

U Robert Raikes u la im ha ka por ka jingsynshar jong u Patsha George uba lai uba synshar naduh 1760 haduh 1820. Kane ka jingroi stet jong ka Skulpynpaw ka la pynlyngngoh wat ia u Syiem hi. Kane ka jingtrei jong U Robert Raikes ka long kum ka jingpynkhih mynsiem kaba jur ka la pur haduh Wales, Ireland, London, Scotland bad kiwei ki ri ha ri Europe. La pynlong ia ka British Sunday School-Union ha ka snem 1803. Ka Skul-pynpaw ka la roi bha ha Ri Bilat baroh kawei bad kiwei ki ri jong ka pyrthei haduh kine ki sngi ne ka por jong ngi.

U Robert Raikes hadien ba u la trei bha ia ka kam u la iap noh ha ka snem 1811, ha ka 5 tarik jong u bnai April ha kaba u dap 76 snem karta. La ong ba u la thiah kum i khunlung ha ka pneh jong ka kmie. Ha ka snem 1880 ka Balang ha Ri Bilat ka ka la tei ia U Mot-Briew jong u harud ka wah Thames kum ka dak jong ka jingkynmaw burom ia ka jingtrei jong u. Hynrei U Mot uba khrawtam ban kynmaw ia u ka long 'Ka Skul-Pynpaw'.

Naduh ba la seng ia ka Skulpynpaw ha Ri Bilat kane ka la pur kum ka ding ia ki Ri jong ka pyrthei baroh kawei. Ia ka American Sunday School Union la seng ha ka snem 1824, ha ri Japan ha ka snem 1893, ha ri China ha ka snem 1901 bad ha Ri India la seng ha ka snem 1876 bad ha kiwei pat ki Ri jong ka pyrthei.

Infants (3--5 snem)

I Ka jinglong bad jingdonkam ki Khynnah rit (Infants)

i Ki long kiba khih:

Baroh ki khynnah rit ki long kiba khih. Naduh ka por ba dang kha ngi ioh-i ba ki pynkhih ia ki kti ki kjat jong ki. Ki pynkhih ia ki kti ki kjat jong ki haba pynthiah lyndang lane haba pyndem pyllup. Ki pynkhih ruh haba ioh lad wat ha ka por ba dang thum. Kumba long ki khyllung ki khynnah rit ruh ki long kiba khih. U Blei u la thaw ia ki ban long kiba khih. Haba ngi tip ba ki long kiba khih ngim dei ban pynsangch ne ban khum ia ki. Ha kawei pat ka liang, ngi dei ban shah ia ki ba kin pynkhih sngewbha katba ki sngewbit.

Ban iarap ia ki khynnah rit kiba don ha kane ka ryta ba kin lah ban san ha ka met, ha ka bor pyrkhat bad jinglong mynsiem bashisha, dei ban pyndonkam ia ki lyngba kane ka jingkhiih jong ki. Ka jingkhiih jong ki, namar kata, ai kan long kaba don jingmut, kum ka nuksa : (a) haba ki nonghikai ki kwah ban pynrwai ia ki khynnah rit, ki dei ban ailad ia ki ban pynkhih ia ki kti ki kjat jong ki ha kata ka rukom ba ka jingkhiih jong ki kan iadei bad ka jingmane Blei lyngba ki jingrwai. Haba pynrwai 'ka lieng ka khih doi-doi' dei ban iarap ia ki ba kin pynkhih ia lade ha kata ka dur kumba khih ka lieng; haba pynrwai shaphang ki khlur, ki khynnah ki lah ban rah ia la ki kti shalor ; haba pynrwai ia ka jingrwai 'Shipai jong U Jisu', ki khynnah rit ki lah ban kaweh kti kum ki shipai bad ki lah ruh ban kyrdem kjat kum ma ki. Ha kane ka rukom ki khynnah ki ioh lad ban shakri ia U Blei ha ka rukom kaba ryntih bad itynnat. (b) Ka jingpynialeh drama ha ka por Khristmas bad ha kiwei pat ki por bakyrpang ka long kawei pat ka lad ba ki khynnah ki ioh ban pynkhih ia ki kti ki kjat jong ki.

i Ki shkor bad ki khmat ki thait kloï :

Ki khynnah rit kiba don ha kane ka ryta ki thait kloï ki khmat bad ki shkor jong ki. Kim lah ban peit slem. Ki shkor jong ki ki pah wang-wang bad kumta kim lah ban shah ia ka jingsawa kaba jam. Bun ruh na ki kiba dang thiah sngi Kum ia kine ki khynnah dei ban buh la ka jong ka kamra ne ka kamra kyrpang. Ym dei ban pynshong ia ki haba shit eh ka sngi bad haba jur ka lyer.

Haba iathuh khana dei ban kren da ka sur kaba jem bad ka ktien kaba synlar. Ki dak shon ki dei ban long kiba heh bad shai. Ki jyingthoh ki dei ban long kiba lyngkot. Ha ka por ba dang hikai ai lad ia ki ban peit shane bad shawei namar ki thait noh lada phah peit tang sha kajuh ka jaka.

iii Ka met ka phad jong ki ka dang lung :

Namar ka met ka phad bad ki shyieng jong ki ki dang lung ngi dei ban pyndonkam ia ki ha kata ka dur kumba ki long. Ngi dei ban ai kam ia ki ban trei kaba iadei bad ka bor met jong ki. Wat haba phah shong ha ki ben dei ban long kiba lyngkot bad skhem bha. Lada lah, kan bha ban pyndonkam da ki lyngknot lane u shylliah. Da kane ka lad ki lah ban shah shkor dyngong ia ki jingiathuhkhana lane kano-kano ka jinghikai. Kynmaw ba ki ben jrong ne kano-kano ka jaka shong kaba jrong ka pynkhih ia ka jyngmut jingpyrkhat ki khynnah ha kata ka rukom ba kin nym lah ban shong suk bad shah shkor ia ka jinghikai. Borabor, ki jaka shong kiba jrong ki wallam tang ka jingsyier bad jingsheptieng ha ki. Kin nym lah da lei-lei ban pynleit jyngmut ia kano-kano ka jinghikai. Nalor kata, ki khynnah kin nym lah ban shong slem tang ha kajuh ka jaka kum ki rangbah. Dei ban ai lad ia ki ba kin iabujli jaka teng-teng para-khynnah. Dei ruh ban ai lad ia ki ban ieng bad iaid kum da kaba phah buh hi ia ki jinggainguh halor ka miej.

iv Kiba wad jingtip da kaba buh jingkylli :

Ki khynnah ha kane ka ryta ki long kiba kwah tip. Ia kane ngi ithuh na ka rukom buh jingkylli jong ki kawei hadien kawei. Kim man thait satia ban buh jingkylli ia kaei kaba don ha ka jingmut jong ki. Kum ka nuksa, haba ino-ino na kiba ha iing ki leit jingleit, ki khynnah kin kylli shano ki leit, balei ki leit, badno kin leit, bad kumta ter-ter. Kin kylli sa kylli haduh ba u nongjubab un da salia artat. Haba ki buh jingkylli ki ju don ki jingkylli kiba sngewtynnat ban jubab bad ki don ruh ki bym sngewtynnat wat tang ban ioh-sngew. Ki don ki jingkylli kiba don nongrim bad ki don ruh kiba khlem nongrim. Teng-teng ki jingkylli kiba dei hok ban jubab ki ialam bakla noh haba la kylli than tik-shitik. Ym tang katta, kham bun na ki nongjubab ki salia ban jubab haba iai ban ia kajuh-pa-kajuh. Ki nonghikai, ha kawei pat ka liang, kim dei ban sngewthait ia ki jingkylli ki khynnah. Kin ialeh katba lah ban jubab la ha kano-kano ka dur. Haba ki kylli, ym dei ban mai hynrei dei ban tei ia ki lyngba kita ki jingkylli. Shisien ba ki la shah mai kin nym kylli shuh, nalor kata, ka jingtieng ka sah duh tat ynda la rangbah. Ki nonghikai bad ki kmie ki kpa ki dei ban husiar bha haba jubab ia ki jingkylli jong ki. Ym dei lano lano ruh ban jubab khlem da pyrkhat bha. Ka jubab kaba bakla, borabor, ka ialam bakla ia ki jingpyrkhat ki khynnah. Shisien ba la pynbakla ha ka por long khynnah kumta baroh shilynter ka jingim jong ki yn shah ialam tang da ka jingbakla. Ki nonghikai kim dei ban teh ia lade da ki jingkylli ki khynnah. Ki lah bad kim lah ban jubab ka shong kat kum ka por. Haba ki khynnah ki buh jingkylli ha ka por ba dang iathuh khana dei ban ong ia ki ban ap haduh ynda la dep kata ka jingiathuhkhana. Ym dei ban jubab ha ka por ba dang iathuh ne kren namar ka jingsngewtynnat ka dkut noh da kaba jubab ia ki jingkylli. Teng-teng don ki jingkylli kiba ki nonghikai kim tip. Ia kino-kino ki jingkylli ki bym tip dei ban iathuh hok ba kim tip. Ia ki jingkylli ki bym tip ym dei ban jubab da kaba shu thaw hi lane da kaba shu thok. Ki nonghikai ki lah ban thok katto-katne sien ia ki khynnah hynrei kan poi ka por ba kin shem ia ka jingthok jong ki. Bad ka long kaba sngewsih ba ynda

ki khynnah ki la shem ia kata ka jingthok kin nym shaniah shuh ia ki nonghikai wat haduh ynda ki la rangbah. Shisien ba ki khynnah ki la shah thok kin nym ngeit shuh da lei-lei ruh wat la ki nonghikai ki kren ia kaba shisha. Khnang ba ngin ioh ia ka jingshaniah ki khynnah, ngi dei ban iathuh hok ia kiei-kiei kumba ki long ha ka dur kaba beit bad ryntih bad da ka jyngmut kaba sngur.

v Kiba shna ei-ei :

Ki khynnah ki don ka jinglong kaba kwah ban shna ei-ei. Borabor, ki khynnah kynthei kin shna ei-ei kaba iadei bad ka jingim kynthei jong ki, bad kumjuh ki khynnah shynrang. Ki khynnah kynthei kin ialeh ban shna khunbynriew ban ioh thum ha la preh lane ban ioh bah ha ka met jong ki. Haba ki ialeh khiew-jakai ki khynnah kynthei ki ju leh kmie ia lade. Ki shet ja da u khyndew bad jyntah da u kynbat ha ki khiew-jakai, bad ynda la ih ki ai bam ia la ki khun kiba long ki paralok jong ki hi. Ki khynnah shynrang, ha kawei pat ka liang, ki ju sngewtynnat tang ban shna iing ha u shyiap bad don ruh ba ki shna iing da ki tin lyngkhot ne byrni jot tang kat ban biang ban shong kai bad ki paralok kynthei jong ki. Teng-teng ngi ioh-i ba haba ki khynnah shynrang bad ki kynthei ki ialeh kai lang ki ju man kmie man kpa para ma ki bad ki pyrshang ruh ban pyrthuh bud ia ka kam ram ba leh ki kmie ki kpa jong ki. Nalor kane, don shibun kiwei pat ki nuksa kiba ju pyndonkam da ki khynnah.

Hadien ba ngi la bishar bniah ia ka jinglong bad jingim jong ki, ngi la dei ban pyrkhath a-iu ngi dei ban leh na ka bynta jong ki. Ngii tip ba ki khynnah ki long kiba ieit bad bang ban iohsngew ia ki jingiathuhkhana. Ki jingiathuhkhana ki dei namar kata ban long kiba don jyngmut na ka bynta jong ki. Ki jingiathuhkhana ki dei ban long kiba iadei bad ka jinglong jong ki. Ngii dei ban kynmaw ba hadien ki jingiathuhkhana dei ban don ki jingpyntrei kam. Ki jingpyntrei kam bunsien ki iarap ia ki ban kynmaw ia ki jingiathuhkhana. Haba iathuh khana shaphang u Moses ngi dei ban iathuh ha kano ka dur la buhrieh ia u hapoh ka shang

halor um bad ha kano ka rukom ka per halor um bad ka tuid haduh ban da poi ha ka jaka sum ka khun syiem u Pharoah. Haden kane ka jingiathuhkhana, phah ia ki khynnah ban shna shang ha kano-kano ka dur da kino-kino ki tiar katba lah ban ioh. Shaphang ka rukom jingpyntrei kam ym lah ban buh pud thik. Ki nonghikai kiba stad ki la sngewthuh kaba kum kano ka jingpyntrei kam ka lah ban iadei bad ka bor jong ki khynnah. Kin pyrshang ban ai ka jingpyntrei kam kaba suk kaba ki khynnah ki lah ban pyndep kloï bad kaba pynsngewtynnat ia ki.

vi Kiba lum ei-ei :

Ki khynnah ki long kiba smat ban lum ia kino-kino ki tiar kat kiba ki lah ban ioh kham tam ia ki tiar phylla. Ki khar bad ki lum kat kiba ki lah ban shem ha phyllaw iing ne ha lynti iaïd jong ki. Ha ki pla sopti-lor ne pla kieng kot ki ju dap da ki kot jot, prek, khiew saraw, ki pliang sbai lyngkhot, ki tin sia-juti bad kiwei-kiwei. Kane ka long ka aiom kaba biang eh ia ki nonghikai ba ki lah ban iarap ia ki khynnah ban lum ei-ei. Ki jingiathuhkhana jong ki kiba bang bad phylla ki ioh jaka ha ka jingim ki khynnah. Ki khynnah ki bang ban kynshew kum kine ki jingiathuhkhana ha ki dohnud jong ki. Shisien ba ki la rung ha ka dohnud ki khynnah kin nym mih shuh da lei-lei ruh. Kin iai neh bad ki nang janai katba ki khynnah ki nangsang ha ka long-ryngieng jong ki. Ka Baibl ka ong, 'hikai ia ki khynnah ha ka lynti kaba bha naduh dang rit kumta ynda ki la rangbah kin nym kynriah noh na ka'.

vii Kiba pyrthuh bud :

Ha kane ka ryta ki khynnah ki long kiba khlaiï bad stet ban pyrthuh bud. Kumba leh ki kmie ki kpa, ki hynmen ne kino-kino kiba la san ki ruh kin pyrthuh thik. Ki kwah tang ban pyrthuh bud ia ka rukom bad jinglong kiwei pat. Lada ki khun shynrang ki ioh-i ba dih sikret u kpa jong ki ki ruh kin pyrthuh bud kumta ; bad ki khun kynthei pat ki pyrthuh bam kwai kum ka kmie jong ki. Teng-teng haba kum kren tohmet kiba la san ki ruh kin kren lem

kumta. Lada kiba la san ki ong 'ma me' lane 'ma pha', ki khynnah ruh kin pynbud ia katei kaju ka ktien. Ki khynnahaba ki pyrthuh bud ki pyrthuh naphang kat kaba ki lah ban iohsngew bad ioh-i—ia kaba bha bad ba sniew kumjuh. Ha kane ka ryta kim pat lah ban pyniapher hapdeng kaba bha bad kaba sniew. Haba ki khynnah ki ioh-i ia u nong-bu-aid ba u rwai ki ruh kin pyrthuh rwai kum ma u, Kim pat sngewthuh u rwai a-iu. Don napdeng ki khynnah kiba pyrthuh bud wat ia ka rukom leh bad rukom kren ki nonghikai. Ki nonghikai ki dei namar kata ban sngewthuh shaphang kane ka jinglong ki khynnah. Ki dei namar kata ban husiar bad sumar bha ha ka rukom hikai jong ki. Ha ka jingshisha, ki nonghikai ki dei ban long ka nuksa ia ki khynnah. Ka ju long ka rukom ba lada u nonghikai u long uba dom riang ki khynnah ruh ki kylla dom riang. Ha kawei pat ka liang, lada u nonghikai u long uba lui-lui bad uba jemnud ki khynnah ki ieit bad burom ia u bad da kane ka pynlong ia ki ban bud ia ka nuksa u nonghikai jong ki.

vili Kiba khlaif ban mutdur

Ki khynnah ki long, da shisha, kiba khlaif ban mutdur. Kano-kano ka jingiathuhkhana kaba ki iohsngew ki pyrshang ban wallam ia ka ha ka dur bad ki pyrshang ruh ban peit ia ka ha ka jynghmut jong ki kumba ka long shisha. Lada iathuh khana ia ki shaphang u Nangsamaris uba bha, shisyndon kin pyrshang ban mut dur ia ki jingjia baroh kumba ki lah ban ioh-i da lade hi (Luke 10: 30-35). Ia ki khynnah ngi lah ban ong ba ki long ki nongmutdur. Ki nonghikai haba ki iathuh khana ia ki khynnah ki la dei ban pyrkat shwa kaba kum kano ka jingiathuhkhana kaba iadei bad ki. Iarap ban iathuh ia ki tang ki jingiathuhkhana kiba biang bad ka bor mutdur jong ki. Ki jingiathuhkhana kiba eh bad kyllaif ki lah ban ialam bakla ia ka bor mutdur ki khynnah. Ia ki nonghikai kiba nang ban iathuh khana tang kiba jem, kiba bang bad kiba iabiang bad ka bor mutdur ki khynnah lah ban ong ba ki long ki nongmutdur. Nalor kata, ki nonghikai kim dei ban pynheh ne pynrit jubor ia ki jingiathuhkhana. Haba iathuh shaphang u Kolalat

bad u Dabid, ym dei ban pynheh ia u Kolaiat kat u ramhah bad ban pynrit ia u Dabid kat i khyndai khup. Dei ban sngewthuh ia ka jingiathuhkhana bad ban iathuh ia ka kumba ka long.

ix Kiba pyrkhat ia 'ka 'lade':

Ngi lah ban ioh-i ba ki khynnah ki long kiba pyrkhat ia ka 'lade'. Ngi ju iohsngew ba ki ju pyndonkam khah-khah ia ka ktien 'Nga' lane 'Jong Nga'. Borabor, ki ong, 'I Mei jong nga', 'I hep jong nga', bad kumta ter-ter. Lada don mano-mano ba knieh ong 'jong nga', lane lada kiwei pat ki khynnah kin ong 'jong ngi', ym dei 'jong phi', shisyndon ita i khynnah iba kam 'jong nga' in dom ia kita kiwei pat ki lok khynnah bad in nym treh shuh ban ialong lok bad ki. Kane ka jingsngew tang 'ma nga' bad 'ha nga' ki khynnah kam lah ban tei ia ka nongrim longbriew-manbriew babha jong ki. Ban pyllait ia ki khynnah na kane, ki nonghikai ki la dei ban iatrei lang bad ki. Ka lad kaba suk tam ia ki nonghikai ba ki lah ban iarap ia ki khynnah ha kane ka liang ka long da kaba pynpule kot lang ia ki, pynrwai jingrwai lang, pynialeh kai lang, bad kumta ter-ter. Lada la iarap ia ki ha kane ka rukom suki-suki ka mynsiem jong lang kan nang khelaiñ katba nangsang ka met jong ki. Kane ka rukom iatrei lang ka iarap ia ki khynnah ym tang ban pyniar ia ka bor pyrkhat jong ki hynrei ka ai mynsiem ruh ia ki ba kin nang khelaiñ ha ka jingiadei bad la ki para-briew ha ka imlang-sahlang kham tam ynda ki la san la rangbah.

x Kiba dap da ka jingsngewphylla suda :

Kawei na ki jinglong ba kham pher ha ki khynnah ka long ka jingsngewphylla. Haba ki iohsngew ei-ei ki sngewphylla, bad haba ioh-i ei-ei ruh ki sngewphylla. Teng-teng haba wan u sahep ne uno-uno u 'riewphylla ha shnong, ki sngewphylla. Ia kata ngi lah ban sngewthuh namar haba ioh-i kum kita ki riwphylla ki ju bud ia ki ban tip ei-ei shaphang jong ki. Haba ki bud kumta ki da kwah

de ban tip ba nangno ki wan bad shano kin leit, balei ki wan bad kumta ter-ter. Ha kane ka liang, ym tang ki khynnah kiba ioh-i hynrei kito kiba shu iohsngew ruh ia ka jingwan ki riewphylla ki sngewphylla kumjuh. Ka jingsngewphylla ka long kawei pat ka lad ba lah ban pynlong lok bad ki khynnah. Ki nonghikai kiba stad ki lah ban pynlong lok bad ki khynnah da ki jingiathuhkhana jong ki kiba sngewphylla, lane da kano-kano ka jingpyn-i dur kaba phylla. Haba ki nonghikai ki lah ban wallam ia kiei-kiei kiba phylla ki khynnah kin shu bud beiti ia ki ha kti ha kjat. Shisien ba la lah ban khring ia ki khynnah sha lade, la lah ban sngewthuh ia ki; bad shisien ba la lah ban sngewthuh ia ki, la lah ban tei ia ka longbriewmanbriew jong ki ha ka rukom kaba dei.

xi Kiba kohnguh :{

Baroh ki khynnah rit ki long kiba kohnguh. Ki kohnguh ym tang ia ki kmie ki kpa, lane ki nonghikai hynrei ki kohnguh ruh ia kino-kino kiba la san. Haba ki khynnah kim kohnguh ka pyn-i ba ki don jingshitom ha ka met lane la don jingpher ha ka rukom sumar ia ki. Ki khynnah ki burom bad kohnguh ia ki briew kiba ieit, kiba lui-lui bad kiba kren da ki ktien kiba jem ia ki. Ki khynnah ki lah ruh ban kohnguh ia ki briew kiba dom-riang bad kiba kren da ki ktien khor ia ki tangba kata ka jingkohnguh kam long naduh ka mynsiem jong ki bad teng-teng ki shu kohnguh ruma tang namar ki sheptieng ia kiba kum kita ki briew. Ka jingkohnguh kaba wan lyngba ka jingsheptieng ka saifi dur ia ka jingisih bad khatduh ka pynkylla long nongshun. Ki nonghikai borabor ki dei ban long kiba shida, ba jem ktien bad ki dei ruh ban lah ban synshar halor jong ki. Lada ki la lah ban bat ia ki khynnah ha lade da ka jingieit, ki la lah ban pynlong ia ki khynnah ban kohnguh ia kiwei pat ki para-nonghikai, lane ia kino-kino ki para khynnah kiba la kham san. Ki nonghikai ki dei ban hikai ia ki khynnah ym tang ban kohnguh ia ki para-briew ki dei ruh ban hikai ha kano ka rukom dei ban kohnguh ia U Blei bad ia ka Ktien jong U.

xii Kiba shaniah ha kiwei pat :

Kam long kaba phylla ban tip ba ki khynnah ki shaniah ia la ka jingim ha kiwei pat. Kim pat sngewthuh ban shaniah ha lade. Haba leit skul, leit jingiaseng ne leit shano-shano ki dap da ka jingphylla, jingartatien bad jingsheptieng. Ban lait na kitei baroh, ki donkam ia kiwei pat ki lok kham tam kiba la kham san ban ialam, ban hikai bad ban synran lem ia ki. Ho-oid ki shaniah ia lade ha kiwei pat hynrei kita ki dei ban long ki lok jong ki kiba ki sngewieit ne sngewjan eh. Kane ka long ka aiom ksiar ia ki nonghikai ban pyniadei ia lade bad ki khynnah khnang ba kin ioh ia ka jingshaniah jong ki. Haba ki khynnah ki la shaniah ha ki nonghikai naduh dang rit kin nym kynriah shuh na ki wat ynda ki la rangbah Ka buit kaba bha tam ia ki nonghikai ka long ban shim ha lade ia ka jaka ki kmie ki kpa. Ki lah ban leh ia kane da kaba shu khroh ia ki lane pyndonkam da kano kano ka buit kaba ki kmie ki kpa ki ju leh ia la ki khun jong ki. Da kaba leh kumne ki khynnah kin shaniah ia la ki nonghikai kum la ki kmie ki kpa. Haba ki nonghikai ki la lah ban ioh ia ka jingshaniah ki khynnah ki la lah ban khring ia ki ban wan sha ka Skul Pynpaw ne sha kano-kano ka skul. Ym tang katta, ki khynnah kin ong hi da lade ia ki kmie ki kpa ban pynkhreh kloï ia ki ban leit sha Skul Pynpaw.

xiii Kiba sngewtynnat ia ki jingiathuhkhana kiba jem :

Ki khynnah ki sngewtynnat ia ki jingiathuhkhana kiba jem bad ba lah ban sngewthuh. Katba ki jingiathuhkhana ki nang lyngkot katta ki nang sngewtynnat. Namar ka bor sngewthuh jong ki ka dang lyngkot kumta kim lah ban iohbat ia ki jingiathuhkhana lada iathuh ia ki tang shisien. Ki khynnah ki kwah ban iohsngew la kumno-kumno haduh lai sien bad saw sien ia kajuh ka jingiathuhkhana. Katba nang iai ban ia kajuh ka jingiathuhkhana katta ki nang sngew muja. Ki nonghikai haba ki kwah ban iathuh ia kajuh ka jingiathuhkhana ki dei ban iathuh ha ki por baiapher ha ka por i-mat kumba ki khynnah ki la klet noh ia kata ka jingiathuhkhana. Haba iathuh ia kajuh ka

long kumba pynkynmaw bad ai jingshai shuh-shuh ia ki namar ki la iohsngew teng. Ki nonghikai ki dei ban don ka bor sngewthuh ba kin iai ban ia kajuh ka jingiathuhkhana tang haduh uta u pud ban ktik ia ka jingsngewtytnat ki khynnah namar lada palat than kin sngewngiah noh bad kan poi ka por ba kin nym treh shuh ban sngap wat lada iathuh ia ki da ki jingiathuhkhana kiba thymmai.

Primary (6-8 snem)

II Ka jinglong bad jingdonkam ki Khynnah pdeng (Primary)

i Kiba pynpaw ia lade:

Ha ki khynnah pdeng ka dak kaba shynna eh kaba ngi lah ban ioh-i ka long ka jingpynpaw ia lade. Ki khynnah ki sngewtytnat ban pynpaw ia lade haba ki lah duh ha skul, Skul Pynpaw lane ha kano-kano ka jingialeh thong para-khynnah. Haba ki jop ki da kwah eh ba baroh ki brieve kin tip ia ka jinglah duh jong ki. Ka jingsngew jong ki ka long ban buh ia lade ha khlieh duh. Kane ka jingsngew ka long kaba dei ban pynshlur da ki kmie ki kpa ne da ki nonghikai kumta ba ki khynnah kin nangkiew irat shaphrang ha kiei-kiei baroh ha ka jingim jong ki. Kaba kum kane ka jingpynshlur donkam ka jingsumar ne sharai kaba thikna khnang ba ki khynnah kin lait na ka jingsarong bad jingfiew beif brieve kham tam ynda ki la rangbah. Ki nonghikai Skul Pynpaw namar kata kin pynrung ha ki khynnah ka jingsngewthuh ba U Blei u don ryngkat bad ki ha ki jingpyrshang jong ki baroh. Kano-kano ka jingjop jong ki ka long namar U Blei u iarap ia ki. Dei namar kata ban ainguh ia U Blei. Lada ka jinghikai ia ka Ktien U Blei ka la shong tynrai ha ki khynnah shisyndon ki khynnah kin nang kham sngewthuh ban burom ia U Blei bad u brieve katba ki nangsang ha ka met bad nang kiew ka kyrdan.

ii Kiba kwah ban ialang kynhun :

Katba dang rit ki khynnah ki ieit duh tang ia lade bad ia ki kmie ki kpa jong ki, lane ia ki para kiba nang ban pynieit ia ki. Don napdeng ki khynnah rit kiba i-sih iap i-sih im ia la ki para-khynnah rit. Ia kane ngi lah ban ithuh namar ki ju shoh ju dat ia la ki para-khynnah haba wan kai ha iing jong ki. Tang teng-teng ngi lah ban shem ba hapteng ki khynnah rit don kiba kwah ban ialang kynhun. Ka jingialang kynhun hapteng ki khynnah ka sdang ynda ki la poi ka ryta naduh hynriew snem shaneng. Naduh hynriew snem shaneng ki khynnah lane ki khynnah pdeng ki la sdang ban sngewtynnat ban ialeh kai lang bad ki para-khynnah. Haba ki trei ia kano-kano ka kam ki kwah ban trei lang bad la ki para-khynnah. Borabor, ki kwah ban don ia lade ha ka kynhun hapteng ki para-khynnah. Ki khynnah kim da sngewthuh eh ia ka jing-donkam lane ka jyngmut jong ka kynhun. Ki kwah ban don ia lade ha ka kynhun tang ban iashngaiñ bad ban ioh ialeh kai para-khynnah. Nalor kata, kim pat da sngewthuh ia ka jyngmut jong ka jingialang lok lane ka jingdonkam ban don paralok. Ha ki khynnah baroh ki para-khynnah ki long ki lok. Ki khynnah ki ju ialong lok ne iakam lok bad kino-kino ki para-khynnah, kynthei lane shynrang, tang shipor, kata, tang ha ka por ialeh kai; lait na kata, kim don lok. Ki ju ialong lok tang para ba iadei jyngmut bad para ba sngewtynnat ia kajuh ka jingialeh kai. Katba dang sngewtynnat ki ialeh kai lang bad tang shu bakla tiak ki la iashrut. Ki long kiba iakloi ban ialong lok bad kiba kloi ruh ban iapra. Ka kam ram ki nonghi-kai ka long kumno ban pynshlur ia ki ban iadon ha ka kynhun. Nalor kata, kin ai kano-kano ka kam ne jingialeh kai ban ialeh da ka kynhun. Ha Skul Pynpaw ki lah ban pynrwai lang, pynpule lang na ka Ktien U Blei, pynleh drama lang bad kumta ter-ter. Katba dang pynleh lang ia kano-kano ka kam, da hikai ruh kumno ban iaieit iwei-ia-iwei pat kumba U Jisu u la ieit shwa ia ki baroh. Iarap ia ki khynnah ba kin sngewthuh ba ka jingdon ha ka kynhun ka long kaba donkam namar iwei i lah ban iarap ia iwei pat ha ka por ba ur ne hap, por ba kem pang, bad shibun

kiwei pat ki jingjia kiba ym lah ban ioh-i lypa. Bunsien haba ki khynnah ki don ha ka kynhun ki klet noh ia ka jingpang kaba don ha ka met jong ki bad ki kham lait ruh na ka kjeh kmie.

iii Kiba ieit ban rwai :

Ngim dei ban klet ba ki khynnah pdeng ki sngewtynnat ia ki jingrwai. Haba don mano-mano ba rwai ka jingrwai thymmai lane ka jingrwai phylla shisyndon kin pyrthuh rwai. Ki khynnah ki ieit ia kiba nang rwai bad ki kwah ruh ia lade ban long kum ma ki. Ia kito lei-lei kiba hikai jingrwai ia ki kim klet shuh. Ka jingrwai ka long kawei na ki lad ba ki nonghikai ki lah ban khring ia ka jingieit ki khynnah. Lah ban don hapteng ki nonghikai ki bym nang rwai ia lade hynrei ki lah hi ban hikai ia ki khynnah pdeng. Ki khynnah ki sngewtynnat eh ban rwai ka jingrwai kaba beit bad kaba lah ban iadei bad ka jingim jong ki. Ho-oid kim pat don ka bor ban sngewthuh ia ka jingmut jong ka jingrwai, phewse, ki kyntien kiba don ha ka ki ktik ia ki ban bang ia kata ka jingrwai. Kum ka nuksa, ki khynnah ki bang ban rwai ia 'KI KHLUR BARIT BA KHIH KHRIP-KHRIP', 'I MEI JONG NGA, I MEI JONG NGA; NGA IEIT EH IA I MEI', 'JISU KHRIST U IEIT IA NGA', 'KA LIENG KA KHIH DOI-DOI', bad kiwei kiwei.

iv Kiba smat palat :

Kawei na ki jinglong kaba itynnat eh kaba don ha kine ki khynnah pdeng ka long ka jingsmat palat. Kane ka lah ban long namar ki dang long kiba khih. Haba ioh ban khih ki sngewtynnat. Don teng-teng ki khynnah ki bym smat. Ka jingbysmat jong ki, lehse, ka long ba ka met jong ki kam shait bha, lane namar ki iaphoi badno-badno. Kum ka nuksa, haba phah leh kano-kano ka kam ia ki khynnah, mar shu dep ong, ka kam ka la dep. Ki khynnah ki leh ia kano-kano ka kam ym dei ba ki sngewthuh ia ka jingmyntoi kaba mih na kata hynrei ka long ba ki sngewtynnat ban leh kumta. Ka jingdonkam ia ki nonghikai ka

long kumno ban bat ia ka jingsngewtynnat ki khynnah ban trei ia ka kam, ban khring suki-pa-suki ba kin sngewthuh ia ka jingmyntoi kaba mih na ka jingtrei kam jong ki, bad ban ialam ia ki ba kin leh ia kano-kano ka kam kaba iadei bad ka bor met bad bor pyrkhath jong ki. Borabor, ka jingpynksan ia ka jingsmat lane ka jingpynrem ia ka jingbysmat ki khynnah kam wallam jingbha ei-ei ia ki: kaei kaba donkam eh ia-ki khynnah ka long ka jinghikai kaba beit bad ryntih ba kin long kiba smat naduh dang khynnah ba kumta ynda la rangbah ruh kin long kiba smat,

v Kiba pyrkhath tang na sla :

Ha ki khynnah pdeng ka bor pyrkhath ka dang jyndong Ka jingpyrkhath kam pat shong tynrai ha ki. Kim pat lah ban bishar ia kaei kaba ki ioh-i, kim pat sngewthuh bha ia kaei kaba ki iohsngew, bad ki kren ia kaei-kaei ruh khlem da pyrkhath — baroh ki long tang na sla. Kano-kano ka bym itynnat ban peit. kano-kano kaba shitom ban sngewthuh, kim sngewbha ban pdiang ia ki. Kim sngewtynnat ruh ia kano-kano ka jingpynbor ne thombor. Borabor, ki sngewbha ban sngap ia kito ki briew kiba iathuh tang ia ka jingshisha bad kiba lah ban pynsngewthuh ia ka jingdonkam ia kaba ki khynnah ki dei ban kohnguh bad leh. Ki nonghikai ha kawei pat ka liang, ki dei ban iarap ia ki ha kata ka rukom ba kin lah ban sngewthuh suki-pa suki ia kaei kaba ki kren bad ia kaei kaba ki leh. Lada la hikai ia ki khynnah ba kin pyrkhath shwa haba ki leh ne kren ia kano-kano ka jingshisha kumta ynda ki la san ruh kin ieng halor kata ka nongrim. Nalor kata, ym dei ban pynrung jubor ha ki ia kano-kano ka jinghren kaba eh bad kyllaiñ kaba pynshitom jyngmut ia ki, lymne ban ong ia ki ban pule ia ki kot kiba ki shem shitom ban sngewthuh. Ki khynnah ki sngewtynnat ban iohsngew ia kano-kano ka jinghren kaba ki lah ban sngewthuh bad ki bang ruh ban pule ia ki kot kiba ki lah ban ioh kem ia ka jyngmut kaba don ha ki. Ngi dei ban sngewthuh ba ki khynnah kiba don ha kane ka ryta kim kwah ban pynshitom ia ka bor pyrkhath jong ki. Kane ka jia long namar kim pat sngewthuh ia ka jingmyntoi kaba mih na kata, nalor kata, ka jabieng

jong ki ka dang lung. Haba phah leh ia kano-kano kaba ki khynnah kim sngewthuh bad kaba kim mon, ki dom ki bitar bad hadien ki sa kylla long khynnah runar. Kham bunsien ki khynnah ki kylla runar namar ngim nang ban sumar ia ki ha ka rukom kaba dei.

Junior (9-11)

Ka jinglong bad jingdonkam ki Khynnah heh (Junior)

Ki khynnah kiba don ha kane ka ryta ki la kham khलाई bad skhem ka met ka phad bad ki la kham iar ruh ka bor pyrkhat ban ia kiwei pat ki para-khynnah kiba poh ryta. Ki dohksah ki la sdang ban trei kam bad iaid ryntih bha ha ki dkhot met jong ki. Ki shyieng ruh ki la nang kham skhem. Namar ki dohksah ki iaid ryntih kumta ha kane ka por ki kwah ban trei kam kaba iadei bad ki bor jingkhलाई jong ki. Katba ki khynnah ki nang trei kam katta ki nang ioh bor ha ka met jong ki. Lada ai lad ki lah ban trei baroh shi ngi khlem thait.

Kawei kaba ngi lah ban ioh-i ka long ba wat la ka met jong ki ka nang kham khलाई phewse ka jingsan jong ki ka kham suki haba ianujor bad kiwei pat ki para-khynnah kiba poh ryta. Kane ka long ka por ha kaba ka jingsan ka met ka la sdang ban thait. Namar kata, haba ai kam ia ki, la dei ban sngewthuh kano ka kam kaba iabiang bad ka bor jingkhलाई (energy) jong ki. Ka jingsan ka met jong ki ha kane ka por ka shong eh ha ka jingnang ban pyndonkam ia kane ka bor jingkhलाई kaba ki don.

i Kiba kwah ia ka jingshisha :

Borabor, ki khynnah heh ki kwah ia ka jingshisha. Kim da sngewtynnat shuh ia ka jyngmut dur. Ki la don ka bor ban pyniakhlad ia kaba shisha na kaba danda. Ki la lah ruh ban sngewthuh ia kano kaba hok bad kano kaba shu thok. Ha kane ka por ki khynnah ki sngew-

tynnat bha ia ki jingiathuhkhana. Ka jingiathuhkhana ka dei ban long kaba shisha (true story). Lada iathuh da ki puriskam ki lah ban sngap tang ba kam pynsngewtynnat ei-ei ia ki. Ki sngewtynnat ban pule ia ki jingiathuhkhana shaphang ki 'riewshlur, ki 'riewkhlaif bad kiba kum kita. Haba ki iohsngew ne ioh-i ia ki khla-kawait bad ki 'riewkhlaif ki iaroh ia ki bad ia lade ruh ki kwah ban long kum ma ki. Haba ki ioh-i lei-lei ia ki briew kiba jop ia kano-kano ka thong ki mane bad ai burom ia ki shaba palat. Ki pyndem ia ka mon jong ki ha ki kam shlur.

Ki nonghikai haba ki pynkhreh kano-kano ka jingiathuhkhana na ka bynta kine ki khynnah ki dei ban wad da ki jingiathuhkhana kiba shisha. Ki dei ban iathuh ia ka kumba ka long—ym dei ban pynheh ne pynrit. Kum ka nuksa, haba iathuh shaphang ka jingialeh hapdeng U Dabid bad u Kolaiat ym dei ban pynheh ia ka. Ka jingpynheh ka lah ban ialam bakla bad pynsniew ia ka jingtip jong ki. Ki khynnah heh borabor haba ki la iohsngew ia kano-kano ka jingiathuhkhana ki bat ia ka thik kumba la iathuh ia ki.

ii Kiba sngewtynnat ban trei da ki kti :

Ki khynnah heh ki sngewtynnat eh tang ban trei jingtrei. Ki lah ban trei baroh shi sngi khlem thait lada ai lad ha ka mon jong ki. Ho-oid, kim pat lah ban sngewthuh kano ka jingtrei kaba pynmyntoi ia ki bad kano ka bym pynmyntoi. Ki trei la ka trei kat kaba shah ha khmat jong ki—kano-kano kaba ki kham sngewtynnat eh. Kim sngewtynnat ban trei ia kano-kano ka kam da kaba shu pynbor. Ki kwah ban trei bun jait ki kam da ki kti jong ki. Haba ioh-i ba ki para-lok khynnah ki iatrei kam ki kwah ban iashim bynta lem. Kim ju kwah ban pynshong thait ia ki kti jong ki.

Kane ka long ka lad kaba bha tam ia ki nonghikai ban pyntrei kam ia ki. Ki nonghikai kham tam ki

nonghikai Skul Pynpaw ki dei ban ai kam ia ki la ha kano-kano ka dur. Ki lah ban phah shim bad phah buh kum ia ki register, ka black board, u chalk, ka Kotbah bad kiwei-kiwei. Lane hadien ba ki la dep iathuh khana ki lah ban phah dro dur ia kata ka jing-iathuhkhana. Lada dei ba ki iathuh na ka Kotbah ki lah ban kylli nangno ki nonghikai ki shim ia ka jing-iathuhkhana. Lada kim lah, ki nonghikai ki dei ban iathuh nangno ki shim ia ka bad ki dei ruh ban ai kam ia ki da kaba phah wad ia ka bynta kaba ki iathuh khana na ka Kotbah. Borabor, pyrshang ban phah wad ia ki dkhoh na ka Kotbah, lane phah ia uwei-pa-uwei na ki ban pule dkhoh katno-katno katba ki nonghikai ki sngewbit. Ki nonghikai ki lah ban ai kam ia kino-kino kiba ki khynnah ki sngewtynnat bad kiba ki dang lah ban leh ha ka bor jong ki. Kane ka iarap ia ki ban long kiba mlien ha ka jingtrei katba ki nangsang. Haba la pynmlien ia ki ha kane ka rukom nadsang rit kumta kin san ruh ha kata ka jingmlien ynda la rangbah.

iii Kiba sngewtynnat ban don ha ka kynhun :

Ki khynnah heh ki sngewtynnat tang ban ialum kynhun-kynhun. Ki kwah ban pyniasoh ia lade bad kano-kano ka kynhun. Ka mynsiem jong ki ka dem tang ban ioh iatrei lem ne ialeh kai lang bad ki para-khynnah ha ka kynhun. Haba ki don ha ka kynhun ki don ruh ka mynsiem ban iaknieh jop para-khynnah ha kano-kano ka thong. Ki kwah ban long ia lade u nongjop lane u lah-duh. Ha kajuh ka por ki don ruh ka mynsiem ban iarap lem ia kiwei pat. Haba uwei u shah rem ha ka thong, bunsien, ki ju sngewlem bad iashah liang sha uta uba rem. Lada don uwei na ki para-khynnah uba shah shoh. baroh baroh kin iarap ia uta uba shah shoh. Ki sngewtynnat ruh ban ialeh ka jingialeh kai kaba hok bad beit bad ki shaniah uwei-ia-uwei pat ha ka jingialeh kai.

Ha kane ka liang, ki nonghikai ki dei ban pynshlur ia ki khynnah heh ban don ha ka kynhun. Ki lah ban pynshlur ia ki da kaba ai kam lane ai kano-kano ka jingialeh kai ba kin ialeh da ka kynhun. Ki lah ban leh ia kane wat ha ka klas hi kaba ki don, kum kaba phah iarwai lang, iapule lang ia ka dkhoh Kotbah, iaduwai lang bad kumta ter-ter. Ka dei ka kamram ki nonghikai kumno ban seng ia ka kynhun bad ha kano ka rukom yn iarap ia ki ba kin lah ban ia-iet lok uwei-ia-uwei pat. Ki lah ban iarap ia ki ha kano ka rukom ba kin lah ban long ki nongjop ha ka thong- ia uba jop ki dei ban iaroh bad pynshlur, bad ia uba rem pat ki dei ban ai mynsiem ba un nang shlur ha ka jingialeh. Haba don ki bym kwah ban iashim bynta ha ka jingialeh thong, ia kita ruh dei ban pynshlur da kano-kano ka lad. Hikai ia ki ba kin nym syier lane tieng ha kano-kano ka jingialeh thong.

iv Kiba khelaiñ eh ka jingkyrmaw :

Dei ha kane ka ryta ba ki khynnah ki khelaiñ eh ka bor jingkyrmaw. Ki lah ban pule lyndet ia kano-kano ka bynta da kaba suk. Haba iathuh ia kano-kano ka jingathuhkhana kaba ki sngewtynnai lane haba phah spei lyndet ia kano-kano ka bynta kaba ki iet ki khynnah kim ju klet shuh wat ynda ki la rangbah.

Kane ka long ka por kaba ki nonghikai ki dei eh ban pynpule lyndet ia ki. Ki lah ban pynpule lyndet ia ki ia kano-kano ka lynnong kot ne dkhoh Kotbah. Haba buh lynnong ia ki ban pule dei ruh ban pyrkhat ia ka bor pyrkhat jong ki kum u khynnah. Lada lah, dei ban buh lynnong ia ki man la ka sngi ban pule lyndet. Kane ka iarap ban pynnep ia ka jabieng jong ki bad ka lah ruh ban nang pynkhelaiñ shuh-shuh ia ka bor jingkyrmaw.

v Kiba sngewthuh ia ka jingkit khlieh :

Haba ki khynnah ki la don ha ka kyrdan khynnah heh ki la sdang sngewthuh ia ka jingkitkhlieh. Haba

ai kam ia ki la ha iing ne ha klas ki kynmaw dngong bad ki kwah ban pyndep noh kloi lan. Teng-teng, haba ki khynnah ki ialeh kai para-khynnah ki klet noh ia la ka kam-ram. Bad don ruh ka por ba ki khynnah kim treh ban pyndep ia la ka kam-ram namar kim sngewbha ia kata ka jait kam, lane namar ka jingtynrong bun ki kam ha ki. Ngi dei de ban kynmaw ba ki khynnah kiba pang borabor kim kwah ban trei ei-ei ruh em. Ki kmie ki kpa lane ki nonghikai ki dei namar kata ban bynshet katto-katne ki kam ha ki kiba ki lah ban trei Kum ka nuksa, ki kmie ki kpa ki dei ban ai ka kam sar iing, khlieng jyngkhlieng, lum ia ki knot ne ia kino-kino ki tiar kiba pra ha iing, phah thied jingthied ia ki mar rit mar ria, phah ai khaw syiar, bsa sniang ne masi ne kino-kino ki kam kiba ki lah ban trei bad kiba iadei bad ka bor sngewthuh jong ki. Lada dei ha Skul Pynpaw, ki nonghikai ki lah ban phah sumar ha ki khynnah ia ki register, duster, u chalk, ki kot skul pynpaw bad kiwei-kiwei da kaba ong ia ki ban shim na ka duli ne armari shwa ban long klas bad ban buh pat ynda la wai klas. Ki kmie ki kpa ne ki nonghikai haba ki ai kam ki dei ban da pynpaw ba ki shaniah ia kita kiba ki ai kam. Da kaba leh kumne ki khynnah kin sngewbha bad kin pyndep ia la ki kam-ram, khlem artatien. Haba jia ba ki khlem pyndep ia la ka kam-ram, lane ki kum klet, lane wat haba ki bakla ym dei ban mai ban tim da ki ktien kiba eh bad khor bad ym dei da lei-lei ruh ban shoh ne sympat. Borabor, dei ban shu sneng ia ki da ki ktien kiba jem. Lada ki leh dukhi, dei ban shu khroh te suki-suki kin sa kylla tip sngi. Haba ki bakla, dei ban shu hikai bad pyn-i ia ki ia kaei kaba ki dei ban leh.

vi Kiba kwah ban pule kot :

Ka jingkwah pule kot jong ki ka kham jur ban ia ki khynnah rit lane ki khynnah kiba la san. Kano-kano ka kot kaba ki ioh-i, ki kwah ban pule. Lada kim sngewthuh ki shu peit kai. Ki kot kiba ki bang

eh ban pule ki long ki kot jingiathuhkhana, kot biria, ki kot kiba thoh shaphang ki 'riew shlur bad kumta ter-ter.

Ha kane ka juk ba la bun eh ki kot kai, ki kmie ki kpa ne ki nonghikai ki dei ban da khmih pyрман ioh ki khynnah ki pule ia ki jait kot kiba pynsniew ia ka jingmu! jingpyrkhat ba dang lung jong ki. La shem ba bunsien ki khynnah mynta ki la leh sting katta-katta ban pule ia ki kot skul, bad ha ka jaka jong ki, ki pule da ki kot pyrthei ki bym tei ei-ei ia ka jingim jong ki. Nalor ki kot skul, katba lah, ki kmie ki kpa ne ki nonghikai ki dei ban wad bad thied ia ki kot kiba bha kiba iadei bad pynsgewtyn-nat ia kine ki khynnah. Pyrshang ban nym a lad ia ki khynnah ban pule ia kano-kano ka kot khlem ka jingtip jong ki.

Intermediate (12-15)

Ka jinglong bad jingdonkam ki Samla dang khie (Intermediate).

Ki khynnah kiba don ha kane ka ryta ki la sdang samla (the period of early adolescence). Kim long shuh ki khyllung lane kim pat long ki rangbah—ki shu long hapteng. Haba ki la don ha kane ka ryta kim sngewthuh ban buh ia lade ha kano ka kyrdan — ban pyrkhat ia lade ba ki dang khynnah, ki la sngew san eh ; ban pyrkhat pat ba ki la rangbah, ki dang sngewkhynnah eh.

Ki samla dang khie ki long kiba iapher. Uwei-pa-uwei u iapher

na kaei kaba u la long mynnymwei
na kaei kaba un sa long lanemwei
ne kiwei pat kiba u iamir ryta.

Ia kane ka jingkylla ha ka jingim jong ki la khot 'Ka ryta jong ka jingkylla' (The age of change). Hynrei ia ka jingkhie samla jong ki la khot 'Ka por jong ka jingim' (The period of life).

Ia ka jingsan ki samla lah ban pyniabynta ar bynta:

1 Dang khie samla (early adolescence)—12-15

2 La samla pura (later adolescence)—16-18

Ki khynnah intermediate ki hap ha katei ka bynta kaba nyngkong.

Kane ka long ka por kaba donkam eb ba ki kmie ki kpa lane ki nonghikai Skul Pynpaw kin ialam ia ki ha ka lynti kaba dei ban kyntiew ia ka jinglong bad jingim babha jong ki. Lada bakla ban ialam ia ki ki lah ban sakma bad hap sha ka jinglong kaba sniew tam. Haba ki la don ha kane ka ryta, ym dei shuh ban kheifn khyllune ia ki Dei ban pdiang ia ki kumba ki long wat la ki leh ne kren ha kano-kano ka rukom.

i Ka jingkylla ha ka jingsan ki dkhoh met (Physical change):

a Ka don ka jingbymryntih ha ka liang ki jingkylla ka jingsan ha ki dkhoh met jong ki. Teng-teng ki shyieng ki san kham kloi ban ia ki dkhoh met. Na kane ka daw ka don ka jingsngew pyrkhing ha ka met haba iaid ba ieng, ba trei ba ktah, ba shong ba sah, bad kumta ter-ter.

b Ka don ruh ka jingsan kyndit ki dkhoh met. Teng-teng ki sngew kumba jong ki kti ki kjat, ki shkor, ka khmut. Ki shem ba ka sopti kaba kylluid tang hapoh shu sngi ar sngi ka la khapngiah noh. Ki khynnah kynthei kim suk khlem da ioh ban peit ia lade ha ka iit khmih man ka teng. Don hapdeng jong ki kiba ur beij kat haba lap. Kane ka wallam ia ki ka jingsngewsih bad jingnoh mynsiem. La shem ba bunsien ba ki samla kynthei ki kham san kloi ban ia ki samla shynrang.

k Ha kane ka por ka don ka jingkylla wat ha ka sur kren jong ki. U ryndang jong ki um long kumba ju long kham tam haba rwai ne kyn-ud sur. Nalor kata

ki long kiba thngan kloi. Ki bam katba ioh lada ka long kaba bang ne ka bym bang—kim da nnewkor eh ia ka jingmad.

Haba sngewthuh bad ioh-i ia kane ka jingkylla ha ki dkhot met jong ki ki kmie ki kpa ki la dei ban sumar bha ia ki. Kim dei ban leh jubor ia ki haba ai kam ne phah trei ia kano-kano ka kam. Ki dei ban bsa bha ia ki kumta ba ka met jong ki kan ym swai ha ka jinglong samla. Ka Skul Pynpaw, ha kawei pat ka liang, ka dei ban pynioh ka kamra kaba kylluid na ka bynta jong ki. Ki ben ki dei ban long kiba kham bha ban ia kiwei pat bad kiba biang bha ban shong.

ii Ka jingkylla ha ka bor pyrkhath (Mental change):

Ki samla dang khie ki long ki 'riewpyrkhat. Ki lah ban pyrkhath tang ia kiei-kiei kiba ki lah ban ioh-i bad iakynduh man la ka sngi ha ka jaka kaba ki shong. Halor kine kiei-kiei, ki pynshong nongrim ia la ka jong ka jingim bad ki pyrkhath kumno ban thaw thymmar ia lade. Borabor, ki pyrkhath tang ia lade. Ki kwah ban laitluid na ka jingsynshar ki kmie ki kpa bad ki kwah ruh tang kumno ban pynsngewbha ia lade. Dei na kane ka daw ba ki sngewpyrshah ia kano-kano ka jingsynshar donbor ne leh bor jong kiba la san. Teng-teng ki ieh noh ia la ka kam-ram haba pynbor ia ki. Kim salia la ka kam jong ki ka long kaba bha ne kaba sniew. Kane ka long ka por kaba suk eh ban ialam ia ki sha kaba bha ne kaba sniew. Ki iaroh, ia uno-uno uba lah ban ialam ia ki lada ia kaba bha ne kaba sniew.

Kane ka long ka kyrdan kaba eh tam ia ki kmie ki kpa bad kumjuh ia ki nonghikai ban sharai ia ki. Ho-oid dei ban sharai ia ki tangba dei ban da leh sumar. Ki kmie ki kpa bad ki nonghikai ki dei ban don ka bor sngewthuh kumno ban iarap ia ki khynnah kiba kwah ban laitluid na ka bor synshar jong ki. Ha

kane ka liang donkam ka jingiatrei ryngkat bad ki—ym dei ban pynbor ne ban ai lad tang ha ka mon jong ki. Donkam ka jingialam kaba bniah kaba lah ban kyntiew ia ki sha ka jinglong bad jingpyrkhat babha. Ki kmie ki kpa ki dei ban burom ia ka rukom pyrkhat jong ki bad ki dei ruh ban shah shkkor haba ki kwah ban iashim bynta ei-ei bad ki.

iii Ka jingkylla ha ka imlang-sahlang (social change) :

Ngi ioh-i ba ki khynnah kiba don ha kane ka kyrdan ki pyrkhat tang ia lade, phewse, ki long ruh kiba shitrhem bad kiba sngewbha ban iatrei lang bad kiwei pat ha kano-kano ka jingkam. Ki pyn-i ia lade ba ki long kiba kohnguh la ki don ha iing ne ha skul ne ha kano-kano ka kynhun kaba ki la jied. Ki sngewthuh ba ki lah ban pynpaw ia lade kham bha tang haba ki don ha ka kynhun. Ia kane ngi lah ban sngewthuh ba borabor ki kwah ban don ia lade ha ka kynhun rwai (choir), ha ki jingkhawai sngewbha, bad kumta ter-ter.

Ka lad kaba ki kmie ki kpa ki lah ban iarap ia la ki khun ka long ban pynshlur ia ki ban ialang lok tang bad ki para-khynnah kiba bha kiba lait na ka bam ka dih, ka kam awria, ka kam khalai, bad ki kam jakhlia baroh. Ki dei ban pynshlur ia ki ban iashim bynta bad ki para-khynnah ha kano-kano ka kam na ka bynta ka shnong ka thaw ne kino-kino ki kam babha. Ki nonghikai Skul Pynpaw ruh ki dei ban pynshlur ia ki ban iashim bynta ha ki kam Balang baroh katba shong ha ka bor jong ki. Dei ban pyn-sngewthuh ia ki ba ka kam Balang ka dei ka kam U Blei ha kaba ki khun jong U Blei baroh ki iasoh lang. Katba lah dei ban pynshlur ia ki ban leit sha ki jingiaseng. Kin iarap ruh ia ki ban pynduh ka jing-sngew ia lade. Nalor kata, kin tei ia ki ban sngewthuh ia ka jingialong shipara para-bangeit ha U Blei.

iv Ki bym lah ban shah ia ka jingwoh nia:

Borabor, ki samla dang khie kim lah ban shah ia kano-kano ka jingwoh dong ne wohnia. Haba ki leh bakla ne kum kren bakla ki kwah ba kiwei kin kren ia ki da ka ktien kaba beit bad shai bad ym dei ban kren siat ne kren kyllaiñ da kumwei pat.

Kan bha shibun ia ki kmie ki kpa ne ki nonghikai ban nym woh nia ia ki la ha kano-kano ka dur. Dei ban sngewlem na ka bynta jong ki. Ym dei ruh ban jop ia ki da ki ktien kiba eh bad khor bad da sumar ban nym ai jingkynthoh ei-ei halor ka jingleh ne jing-kren jong ki.

v Kiba sngewartatien ia la ka jong ka jingngeit:

Kawei na ki jingma kaba sniew eh kaba don ha ka jinglong jong ki samla dang khie ka long ka jing-sngew artatien shaphang U Blei. Kane ka lah ban mih na ka jingpyrkhat jong ki shaphang ia lade lane ka lah ban long na kano-kano ka daw. Ha kane ka liang donkam ka jingiarap ki kmie ki kpa lane ki nonghikai ban tei ia ka jingngeit jong ki. Kdew ia ki ia ka Ktien-U-Blei kano-kano kaba ki lah ban tip. Lada jia ba kim tip, iarap ia ki ban wad da lade hi.

vi Kiba pyrkhat shaphang ka kam shongkha-shongman:

Ynda haba ki khynnah ki la poi ha ka ryta kaba ki la khie samla ki la sdang ban pyrkhat ruh ia ka longiing-longsem. Ki samla kynthei ki la sdang kwah ban ialang lok bad ki samla shynrang kumba ki ialang bad ki para-kynthei, bad kumjuh ki samla shynrang.

KA RUKOM HIKAI (METHOD)

U Petros haba u kren ia u briew uba dkoh u ong, "Hyn-rei ia kaba nga don, nga ai ia me .." (Ki Kam 3:6) Kane ka long ka nuksa ia kiba ngeit baroh ban ai ia kaei kaba ki

don ha kiwei pat ia kita kiba kwah ban ioh bynta lem na ka jingdon jong ki. Ka Baibl ka la kylla long ka kitab kaba kyrpang ia iwei-pa-iwei i khynnah, ka jor tynrai na ka bynta ki jingiathuhkhana shaphang U Blei bad U Jisu Khrist, bad ka long ruh ka kyrdon kaba kyntiew ia ka jinglong jingim jong ki

Ki rukom hikai ki don bun jait : 1) Da kaba iathuh khana na ka Baibl, 2) kaba iakren, 3) kaba ialeh drama, 4) kaba bat ha kti bad iakren shaphang ki dur kiba don ki jingiathuhkhana ha ka Baibl, 5) kaba dro dur da ka kti 6) kaba ialeh kai da ki shynriah-ti, 7) kaba pynpule tyndet na ki dkhoh ha ka Baibl, 8) kaba kyli jingkyli bad jubab, 9) ka jingrwai, 10) ka jingduwai, bad kumta ter-ter.

Ka jingiathuhkhana

Ka jingdonkam jong ka jingiathuhkhana

Ka lah :

- 1 Ban ai jingtip lane ban pynioh katto katne ki mat haba hikai
- 2 Ban pynsgewbha lane pynkliih bad bat ia ka jing-sngewtynnat
- 3 Ban iarap ha kaba weng ia ki jingeh
- 4 Ban ktik ia ka jingsngew bad ban tei ia ka rukom jinglong jingim
- 5 Ban pynsan ia ka jingsngewthuh bajylliew, ka jing-mut-dur, ka bor ban pynshongnia
- 6 Ban pynthanda ia ka jynghmut jingpyrkhat
- 7 Ban tei ia ka jingiajan hapdeng u nongsngap bad u nongiathuh
- 8 Ban ialam sha ka jingmane Blei

Ka jinglamphrang :

Pynkhreh ia ki khynnah ban shah shkor ia ka jingia-thuhkhana. Ym dei ban iathuh ei-ei ia ki mat jong ka jing-iathuhkhana. Ka ktien lamphrang ka lah ban khring ne pynduh noh ia ka jingsngewtynnat ki khynnah. (a) Ym dei ban iathuh ia ki khynnah ia kaba kut jong ka jingiathuh-khana (b) iathuh lyngkot ia ka jingiathuhkhana da kaba ong 'Ngan iathuh ia phu ka jingiathuhkhana shaphang

Ka jingiathuhkhana**Ka dei :**

- (a) ban don ka jingiathuh shaphang ka jingim bad jing-long jong uwei lane ar ngut ki biew lane kiei-kiei—ym dei ban pynbun jinis than
- (b) ban pynmih jingkylli ne jingeh ha ka jyingmut

Ka jinglong jong ka jingiathuhkhana:

- (1) Ka jingiathuhkhana ka dei ban long kaba jem bad shai
- (2) Haba iathuh dei ban bat lane shim tang ia kawei ka liang jong ka jingiathuhkhana
- (3) Ki jingjia ki dei ban bud kawei hadien kawei pat
- (4) Dei ban kyntiew khyndiat-pa-khyndiat ia ka jingsngewtynnat ki khynnah haduh ban da poi ha ka khet kaba ha khlieh tam (climax)
- (5) Khnang ha kin sngewthuh bha, pynkhreh 4 ne 5 tylli ki dur rit (dro malu-mala) kiba don ki mat kiba donkam eh ha ka jingiathuhkhana. Da thoh kyr-teng ha kawei-pa-kawei ka dur. Nangta shna paragraph ia kawei-pa-kawei ka kyr-teng kaba don ha ka dur kat kum kata ka jingiathuhkhana.
- (6) Ka jingiathuhkhana kam dei ban long kaba jrong eh

Ka jingkiew khet (climax) : Kane ka long ka met bah jong ka jingiathuhkhana. Ka ai ia ka tynrai jong ka khubor lane ka pyndep ia ka jingthmu. Baroh ki bynta kiba don ha ka jingiathuhkhana ki kit ha ka climax. Dei ha ka climax ba lah ban ioh jubab ia ki jingkylli bad jingeh kiba mih ha ka jyngmut ha ka por ba dang iathuh khana

Jingpynkut :

Haba pynkut ia ka jingiathuhkhana donkam ban pynkut tang kawei lane haduh ar tylli ki sentence. Haba la pynkut ym dei shuh ban dang don jingdum ha kino-kino ki jingkylli. Ki jyngmut jingpyrkhat ki la thanda jai. Kum ka nuksa, haba u bried uba matlah u la peit, ka jyngmut ka la suk. Hynrei ka jingkylli kaba dang sah ka long 'U leh a-iiu haba u la peit? (U iarah ia U Blei bad u bud ia U Jisu)

U Nongiathuhkhana u:

(a) Dei ban **sngewtynnat** ia ka jingiathuhkhana. Ka jingiathuhkhana ka shu pyndep ia ka jingthmu jong ka lada ki nongsngap ki sngewtynnat Ki nongsngap ki sngewtynnat ia ka jingiathuhkhana lada u nongiathuh u sngewtynnat ia ka

(b) Dei ban **tip** ia ka jingiathuhkhana. Shwa ban iathuh ha klas u dei ban da pyrshang hangno-hangno. Haba pyrshang u dei ban ong jam kumta ba u lah ban ioh kem ia kaei kaba u kren

(k) Dei ban **im** ha ka jingiathuhkhana. U nongiathuh u pyrshang ban ialam noh ia ki khynnah na ka klas sha ka lypung ha kaba don ka jingiathuhkhana U im ha kaba u mut dur ia ka jingjia bad jingiakynduh jong kita kiba u iathuh khana. U nongiathuh u dei ban **tip** ia kita kiba u iathuh khana kumba u la lah iakynduh ia ki, u dei ban **ioh-i** ha ka jingialeh, ban **iohsngew** ia ki haba ki iakren bad wat ban sngew ia kaei kaba ki sngew

(d) Dei ban iakynduh ia ka jingtynjih ha ka jingiathuhkhana. Ia kane dei ban leh shwa ban iathuh ia ka. Kaei ka jingthmu? Hato u nongiathuh u tip bad u pdiang ha lade ia kata ka jingthmu? Hato u pyrshang ia ka ha ka jingim jong u kaba man la ka sngi. Kaba iakynduh ia ka jingtynjih ka mut ka jingkhmih-iit ia lade, ku jingphla ia ka jingduna man la ka por, bad ka jingaiti ne jingpynkyrpang thymmai

Kaba iathuh ia ka jingiathuhkhana

Ki tiar :

1 **Ki kyntien** - - Ki dei ban long kiba jem bad sngewtynnat, kiba beit - - ym dei ban pynkylluiñ. Pyrshang ban kiar na ki kyntien kiba jrong bad ba eh ban sngewthuh. Kiar na ki kyntien kiba eh kiba pyndonkam ha ka Baibl lait noh haba pyndonkam ia ki kyntien kiba la kyntiew kumba ki long (quotations)

2 **Ka sur** : Ym dei ban halla, phewse haba kren dei ban iohsngew

Ka sur ka dei ban hiar bad kiew kat kum ka jingdonkam bad ka por

3 **Ka jingsangheh** : Ym dei ban shu pynmareh naduh basdang haduh ban da kut ka jingiathuhkhana. Donkam ban pynsangheh teng-teng kham tam haba poi ha ki mat jingiathuhkhana kiba kham sngewtynnat. Da kaba sangheh ka ktik ia ka jingmut jingpyrkhat bad ka pynsngewtynnat ia ka jingiathuhkhana

4 **Ka khmat bad ki kti** : Ka jingpyndonkam ia ka khmat bad ki kti ka iarap ia u nongiathuh ban pynpaw ia ka jingsngew kaba don ha ka jingiathuhkhana, bad ka iarap ruh ia u ban batai kham shai ia kaei kaba don ha ka jingiathuhkhana (kum, 'jrong katne'— u pyn-i da ka kti)

5 **Ka jaka** : U nongiathuh u dei ban shong ne ieng markhmat bad ki nongsngap bad u dei ruh ban lah ban ioh-i ia ki khmat jong ki. U nongiathuh bad kumjuh ki nongsngap ki dei ban ioh ka jaka shong kaba suk

6 Ym dei :

1 ban pynwit ia ka jingiathuhkhana da kaba buh jing-
kylly ban shem la ki khynnah ki sngap ne em

2 ban pynwit ia ka jingiathuhkhana da kaba ong ia ki
nongsngap ban shahshkor

3 ban bat ia ka kot hikai ba khmāt jong phi. Kane ka
pyniuit ia phi bad ia ki khynnah. Yin dei ruh ban pule ia
ka jingiathuhkhana na ka kot

4 shuh ban bteng ia ka 'jinghikai' haba la kut ka jing-
iathuhkhana

7 Ka jingthmu :

Kawei-pa-kawei ka jingiathuhkhana ka dei ban don
ka jingthmu.

**Kiei ki rukom hikai ia ki khynnah rit (Infants) bad
khynnah pdeng (Primary)?**

1 Ka jingiathuhkhana (story-method)

Kawei na ki rukom kaba bha tam ban hikai ia ki
khynnah rit ka long ban iathuh khana. Haba iathuh khana
ia ki dei ban iathuh kumba ju iathuh ha la iing — ym dei
ban iathuh kumba iathuh khana ha iing-manc (sermon). U
Jisu borabor haba u hikai ia ki briew u ju pyndonkam da ka
pharshi khnang ba ki lah ban sngewthuh bha bad bat ia ka
jinghikai. Da kaba iathuh khana u nonghikai u lah ban
hikai ia ki khynnah ia ka Ktien-U-Blei. Ka jingiathuhkhana
ka long ka jinghikai kaba neh ha ki khynnah bad kumta ki
lah ban kynmaw biang-biang wat ynda ki la rangbah.
Bunsien ki khynnah ki bynnud ban kut noh ka Skul pynpaw
haba ki iohsngew ia ka jingiathuhkhana kaba sngewtynpat

2 Ka jingiathuhkhana kaba kumno?

i Kiba iajan bad kiba lah ban ioh-i :

Haba iathuh khana dei ban iathuh ia kiei-kiei kiba iajan bad kiba lah ban ioh-i. Lada iathuh ia kiei-kiei ki bym ju ioh-i ki khynnah kim lah satia ban sngewthuh. Kum ka nuksa, haba iathuh shaphang ka jhad ue ka rel ha ki khynnah ki bym pat ioh-i, ki sngewkulmar bad shitom jynghmut ban sngewthuh. U Jisu ruh u ju iathuh khana ia kiei-kiei kiba iajan bad ju ioh-i, kum, u Nongbet, ka Langbrot kaba la jah noh, u Tiewlili, u Bartimaïos, bad kiwei kiwei

ii Kaba don jingthmu :

Ha man kawei-pa-kawei ka jingiathuhkhana u nonghikai u dei ban don ka jingthmu. Lada u iathuh shaphang ka jinglong khynnah u Moses, u Joseph ne Samuel u dei ban don ka jingthmu. Ha ki kot likai ba la pynmih da ka Synod ruh la ai hangto ia ka jingthmu jong kawei-pa-kawei ka jingiathuhkhana ban ialam ia ki khynnah sha kata ka jingthmu. Haba u nonghikai u iathuh ba U Jisu u long u lok jong ki khynnah baroh — hangta u lah ban pynwan ia ka jingthmu jong ka. Ka jingiathuhkhana ka lah ban long kaba jrong ue kaba lyngkot hynrei ka dei ban don ka jingthmu

iii Kaba don liang :

Haba iathuh khana shaphang u Sakhaïos, na kano ka liang dei ban shim ban batai ha kata ka rukom ba ki khynnah kin lah ban mut dur ia u — ia ki kam bad ia ka jinglong bad jingim jong u. Haba shim ia u Sakhaïos, dei ban iathuh beit thik tang ia u hi — ym dei ban shim ia uwei pat, namar kane ka lah ban pynphai noh ia ka jingpyrkhat bad jynghmut dur jong ki. Hynrei haba shim pat ia u nongtuh ha Jerikho, dei ban iathuh beit tang ia u ; ym dei ban iakhleh jaktung bad u nongsamaria lanc bad kiwei-kiwei pat. Kaba shim tang ia kawei ka liang, ki khynnah ki lah ban bud bad kynmaw

iv Kaba iadei kat kum ka bor pyrkhath jong ki :

Lada iathuh ha ki shaphang u Belsabul ne u mynsiem bymkhuid ki khynnah kim lah da lei-lei ruh ban sngewthuh. U nonghikai um dei ban iathuh ha ki ia kiei-kiei kiba long sha lyndet ka bor pyrkhath jong ki. Don shibun ki jingia-thuhkhana kiba iadei bad ka bor pyrkhath jong ki bad kita ki long ki jingiathuhkhana shaphang u brierw uba dkoh, uba matlah, u nongkhrong, bad kumta ter-ter

3 Ki kyntien ba ngi ju pyndonkam :

Don ki kyntien ha ka Baibl kiba ki khynnah kim sngewthuh satia. Ki khynnah ki lah ban tip tang haduh 1000 kyntien ei-ei bad kita ki long kiba ki ju pyndonkam man la ka sngi. Lada u nonghikai u ong 'Khun-sarong awria', ki khynnah kim sngewthuh ei-ei ; hynrei lada u ong 'Khynnah runar' lane 'Khynnah tam sneng', ki lah ban sngewthuh namar ka don ka jingiaidei bad ki. U nonghikai u dei namar kata ban iathuh da ki ktien kiba jem bad ki sentence kiba lyngkot namar ka rukom pyrkhath jong ki ruh ka dang lyngkot. Lada ki khynnah kim sngewthuh ia ka ktien ne ki kyntien ki lah ban iapher jynghmut bad u nonghikai

4. Ka sur ktien :

Haba iathuh khana ym dei ban halla kumba iathuh khana ha iing-mane. Kane ka rukom sur kam iadei bad ki khynnah, lehse, ki lah ban sheptieng. Ka sur ka dei ban long kaba jem bad sngewtynnat. Na ka sur ka pynlong ia ki khynnah ban sheptieng bad phet, lane ban sngewtynnat. U nonghikai u dei ban kynmaw ba ryngkat bad ka sur ka don ka bor. Ka sur ka dei ban long borabor ha kata ka rukom ba ki khynnah ki lah ban kem. Haba ka ktien ka thew ia u nongtuh, dei ban long jar-jar; haba ka dei pat kumba kren u syiem, dei ban kren ha kata ka sur

5 Ki jingleh (actions) :

U nonghikai u dei ban nang ban pyn-i da ki jingleh. Katba u nang iathuh u dei ruh ban pynbud da ki jingleh.

Haba pyn-i da ki jingleh um dei ban leh palat ne duna than. Haba iathuh shaphang u Samson u dei ban iathuh ia ki ba u long u brieve tangba u kham khlaif ban ia ki para-brieve baroh. Ym dei ban pynheh ia u Samson kat u Ramhah ne uno-uno u jait ksuid. Kane kan pynshitom jingmut ia ki khynnah ban mut dur. Haba iathuh ia U Jisu ba u long uba jemnud, u nonghikai ruh u dei ban pyn-i ka dur jemnud ia ki khynnah. Da kane ka rukom ki khynnah ki lah ban mut dur ia ka jingjemnud U Jisu. Da kumwei pat, lada u nonghikai u iathuh ia ka jingjemnud U Jisu hynrei ia lade pat u pyn-i da ka khmat kaba idom riang bad ka kynhied brieve artat shane bad shatei, kan pynshitom jingmut ia ki khynnah ban mut dur shaphang ka jingjemnud U Jisu. Ki jingleh borabor ki iarap ia ki khynnah ban kynmaw bha ia ki jingiathuhkhana

6 Ki tiar trei (visual aids) :

Ki tiar ki long kiba donkam haba iathuh khana. Da ka jingiarap ki tiar ki khynnah ki lah ban sngewthuh bha ia ka jingiathuhkhana. Ha Ri Khas' jong ngi u nonghikai um pat lah ban ioh ia ki tiar kiba biang, kum ki cinema sounds, Flannelgraph, Flash Cards, bad kiwei-kiwei na ka bynta ban pyndonkam ha ka Skul Pynpaw. Hynrei ki tiar kiba u nonghikai u don ki long :

1 **Black Board**—ha kaba u lah ban thoh ne dro ia kiei-kiei kiba u hikai tang ban shu ialam jingmut ia ki khynnah

2 **Ki dur**—kiba u pyndonkam ban pyn-i tang ban iarap ia ki khynnah ba kin lah ban kem ia ka jingmut ka jingiathuhkhana, kum haba iathuh ia u brieve uba dkoh, uba matlah bad kumta ter-ter

7 Kaba kylli jingkylli bad jubab :

Ki khynnah ki lah ban ioh kem ia kano-kano ka jingiathuhkhana da kaba buh jingkylli bad ki jubab kumba kylli kot Tikir, bad History : kum, 'Hangno la kha ia U Jisu?', 'Ha Betlehem Judia'. Kane ka long kaba donkam bha ia ki khynnah rit

8 Kaba iakren lang :

Kane kam dei kum ka jingiaphylliew-jyngmut (discussion) ba pyndonkam ha ki samla. Lada u don ki dur ha kti, ai kin rapeit bad iakren halor kita ki dur para-khynnah bad nangta u nonghkai un sa batai ia ka jyngmut kita ki dur halor ka nongrim kaba ki iakren

9 Ka jingpyntrei kam :

Kane ka long ban ailad ia ki khynnah ban iatrei ei-ei. Lah ban phah airong ha ki ia ki dur da u let rong, lane phah shna ia kano-kano kaba ki khynnah ki sngewtynnat

Kiei ki rukom hikai ia ki khynnah heh (Junior) ?

Ka jingpyndonkam ia ka Baibl :

Ka jingeh :

Ka jingpule lynter-taid ia kano-kano ka kot kam mut satia ba lah ban sngewthuh ia kaci kaba la pule. Wat haduh ki khynnah kiba la li snem ka ryta ki shem shutom ban sngewthuh bad bat ia ka jyngmut katba ki dang pule. Kane ka long kaba shisha kham tam haba pule ia ka Baibl. Wat la katta ruh ngi kwah ban pyndonkam ia ka bad kata ka long ba ym dei ban shu pyndor ia ki khynnah ban shu pule tang kumta ha klas hynrei ba kin pule da ia ka mon sngewbha ha la ing. Ban jop ia kane kham tam ia ki khynnah heh, ngi dei ban wad lad kumno ban pynsngewtynnat ia ki jingiathuhkhana kiba ngi lah ban shem ha ka Baibl

Ka rukom pyndonkam haba iathuh khana :

(a) Da batai bniah ia ka jingiathuhkhana. Ka jinglam-phrang ka dei ban long kaba sngewtynnat khnang ba ki khynnah kin shah shkor. Pyrshang ban iathuh ha kata ka rukom ba ki khynnah kin lah ban kem bad lum ia ka jing-shisha kaba don ha kata ka jingiathuhkhana. Da kane ka lad ki khynnah kin icit ia ka jingiathuhkhana. Kum ka nuksa, haba iathuh shaphang kaba pyngoit ia kiba pang

ñiangthohlieh da pyndonkam ruh da kaba pule ia ka bynta ha ka Baibl kaba iathuh shaphang kane ka jingshisha. e.g., Lebitikos, lynnong 13

(b) Dei ban iathuh ia ka ha ka first person, kata ka mut, u nonghikai u dei ban pyrkhat ia lade ba u long ma u hi uta uba ioh-i bad tip ia ka jingiathuhkhana kumba ka long na kaba u shim ban iathuh : kumta u dei ban sdang “Nga.....”

Ki rukom hikai :

(1) Ki khynnah kin plied ia ka Baibl na ka bynta kaba dei ban hikai. Wat shah ia ki ban peit ia ka Baibl hynrei kin peit beit sha u nonghikai tat haduh ba u nonghikai un ong ia ki ban peit bad pule ia kano-kano ka dkhoh ha ka Baibl kaba u mut ban hikai

(2) U nonghikai un sdang ban iathuh ia ka bynta kaba sngewtynnat eh kaba don ha kata ka lynnong ne dkhoh

(3) Hadien ba ki khynnah ki la dep pule ia ki dkhoh, u nonghikai un ai ka jingbatai kaba shai kawei ka dkhoh hadien kawei pat haduh ba ki khynnah kin da sngewthuh shai

(4) Dei ban don ka por sangeh haba hikai — ym dei ban hikai lynter-taid. Ka jingsangeh ka ailad ia ki khynnah ban pynjah thait ia ka jingmut jingpyrkhat, ka bor sngew, bad ka bor ioh-i jong ki. La kumno-kumno ka jingsangeh ka dei ban long tang khyndiat minute bad nangta sa bteng ia ka jinghikai

(5) Phah ia ki khynnah ban pule katto-katne dkhoh na ka Baibl bad hadien kata ong ia ki ban wad ia kino-kino ki bynta kiba donkam kiba don ha kita ki dkhoh. Da kaba leh kumne kan iarap ia ki ban shem da kaba suk ia kino-kino ki bynta kiba donkam ynda ki la san

(6) Hadien ba la dep hikai, u nonghikai un pyrshang ban shna jingkylli na kata ka bynta kaba u la lah hikai. Ki jingkylli ki iarap ban pyniar ia ka jingtip jong ki khynnah

Borabor, dei ban hikai ia ki ban jubab ia ka bynta kaba iadei bad ki jingkylli

(7) Kaba pyndap ia ki jingduna ka long kawci pat ka rukom hikai kaba dei ban pynmlen ia ki khyannah, Kane kan iarap ia ki ban wad da lade hi ia ka jingtip kaba kham jylliew. Kum ka nuksa : Salm 95

Jingkylli : 95 : 4 Nga tharai ki briew kiba rwai ia kane ka jingrwai ki ioh-i ka khyndew bajylliew bad ki lum kiba jrong

95 : 4&5 Ia kine kiei-kiei la shna da U Blei bad ki long ki jong U

95 : 6 Bad kumta ngi ngin —————
ia U

Salm 19 : 1 Haba peit ha kane u pyrkhath shaphang ki ————— jong U Blei

Salm 147 : 8 U nongthoh u khmih ia ki —————
bad ————— bad —————

Kiei ki rukom hikai ia ki Samla dang khie (Intermediate)

(1) Ka jingiaphylliew jynghmut (discussion) :

Hadien ba u nonghikai u la dep batai ia ka bynta kaba u hikai un ailad ia ki samla ba kin iaphylliew jynghmut. U nonghikai un pynkhreh lypa katto-katne ki jingkylli na ka lynnong kaba u hikai bad un buh ha khmat ki samla ban iakren bad iatai nia. Katba lah un pyrshang ban pynshlur ba iwei-pa-iwei i samla in iashim bynta ha ka jingiatai nia. Un pyrshang ruh ban pynjan ia lade bad ki ha kata ka rukom ba un lah ban hikai ba iwei i samla in iajan ne sngewjan bad iwei pat ha ka kynhun

(2) Da kaba iathuh khana :

Ka jingiathuhkhana ka dei ban long borabor shaphang ki 'riewshlur ne 'riewblei ha ka Baibl. U nonghikai haba u kwah ban hikai shaphang ka jingialong lok, u lah ban shim

nuksa ia ka jingialong lok hapteng u Dabid bad u Jonathan; bad haba u mut ban hikai shaphang ka jingia-ibha samla, u lah ban shim na ka jingiathuhkhana shaphang u Samson bad ka Delila. Ki don shibun ki nuksa ha ka Baibl kiba don la ka jong ka jong ka jinghikai kat kum ka jingdawa jong ka por. Kine ki nuksa kin iarap ban pyllait ia ki samla na ki jingma, jingsniew bad ki jingeh har rukom kiba iakynduh ha ka jingim jong ki. Kin pynshlur bad ai mynsiem ruh ia ki ban ieng ha ka nongrim kaba bha kaba iadei bad ka Ktien-U Blei


(3) Ka jinglong dkhoh bapura ha ka Balang :

Ka jinglong dkhoh bapura ha ka Balang ka long ka bynta kaba donkam eh ba u nonghikai un thep ha ki samla dang khie. Un pynshlur ha iwei-pa-iwei iba la don ha kane ka kyrdan kham tam kito kiba la kot ka ryta 14 snem ki dei ban long 'riewdkhoh noh. U nonghikai un ai ka jinghikai kaba paka ba kumta kin sngewthuh ia ka dor ka jinglong dkhoh bapura ha ka Balang. Un pynsngewthuh ba ka jinglong dkhoh bapura ha ka Balang ka long ka jingai-ti ia lade ha U Trai Jisu

(4) Ka jingpynlong lok bad kiwei pat :

Katba lah u nonghikai un pyrshang ban pynrung ha ki samla dang khie ia ka mynsiem ialong lok bad kiwei pat ki para-briew. U Trai Jisu u hikai bha ia kane ka rukom da kaba ong 'Phi phi long ki lok jong nga'. Dei ban pynsngewthuh ba baroh ki briew ki long ki lok jong ki samla dang khie kham tam ki kmie ki kpa jong ki hi, bad U Trai u long u lok uba bha tam. Ka jingialong lok borabor ka khring ia ki ban don ka mynsiem shaniah iwei-ia-iwei pat kham tam ha ki por ba ki shem jingeh

Ha ki ri kiba la shai, ia ki samla shynrang kiba dang khie ki ju buh nonghikai da ki nonghikai shynrang, bad ia ki samla kynthei kiba dang khie ki buh nonghikai da ki nonghikai kynthei. Ki leh ia kane khnang ba ki samla kin nud ban iathuh ia ki jingeh jong ki baroh ha ki nonghikai kiba long ki paralok jong ki



(5) Ka jinglong jingim kum ka nuksa :

Kane ka rukom jinghikai ka long kaba shitom shi-katdei. Hangne ka thew ba u nonghikai u dei ban im ia lade kumba u hikai ia kiwei pat. Kane ka long ka nuksa kaba U Trai Jisu u la hikai ia ngi. Ki kmie ki kpa ruh ki dei ban long ka nuksa lynda kumta ka jinghikai jong ki ia la ki khun kan shu long lehnohei. Dei ban hikai ia ki samla dang khie ba kin long ka nuksa babha ia kiwei pat ki para samla ki bym pat tip ia ka jinghikai U Trai Jisu

(6) Ka jingjop ia ki para-mynsiem :

Ka long kaba donkam ba ki nonghikai kin pynrung ha ki samla dang khie ia ka mynsiem ialap ia ka Kospel. Ka jingialap ia ka Kospel ka long ka kam-ram jong uwei-pa-uwei u Khristan. Lada lah ban pynrung ha ki samla ia kane ka mynsiem ialap kumta kin long ki nongjop ia ki mynsiem na ka bynta U Khrist

(7) Ka kam nongialam

Ki samla dang khie ki sngewtynnat shibun ia ka kam nongialam. Haba ki iohsngew shaphang u Joshwa bad kiwei-kiwei ki nongialam ba kumno ki jop ia ki jingeh baroh da ka jingialam U Blei, ki sngewbha katta-katta. Ki kwah ia lade ruh ban long ki nongialam la ha kano-kano ka dur. Kane ka long ka por kaba bit eh kumno ban hikai ia ki ban long nongialam ka Balang ha ka lashai-lashisngi. Katba ngi lah ban tip ba kiba bun na ki nongialam ha ka Balang bad ki nongialap ia ka Kospel ki mih na ka Skul Pynpaw

KA JINGPYNKHREH IA KA LYNNONG (LESSON PREPARATION)

Teng-teng ka ju don jingpynshoi ha u nonghikai ba ym donkam ban da pynkhreh haba hikai ia ki khyannah Skul Pynpaw. Bunsien haba u nonghikai u la tip ia ka jingiathuhkhana kaba don ha kata ka lynnong kaba u mut ban hikai um ju pynleit jyngmot shuh hato don

a-iu ha kata ka jingiathuhkhana. Shisien ba u nonghikai u la ioh ia ka jingiathuhkhana u pyrkhath ba ka la biang ban shu iathuh ia ka kumba ka long khlem da pyrkhath yn jia a-iu ia ki khynnah hadien ka jingiathuhkhana

Ha ka jingshisha, u Nonghikai Skul Pynpaw u dei ban kham aiti, met bad mynsiem, ban ia kiwei pat ki para-nonghikai ha kaba pynkhreh ia ka lynnong. Ka kam nonghikai Skul Pynpaw ka long ka kam kaba kyntang kaba dei ban ioh ka jingkhath na U Blei hi ban trei ia kane ka kam hikai-niam ha ka Balang

Ki nongrim haba pynkhreh ia ka lynnong :

1 Ka jingduwai :

Ka jingduwai ka dei ban don ha uwei-pa-uwei u nonghikai Skul Pynpaw. Namar ngi long ki khun jong U Blei kiba shaniah ha ka bor jong U kumta ngi donkam ruh ia u nonghikai uba don kum kata ka mynsiem. Kum kiba ngeit ngi sngewthuh ba khlem ka bor ka jingduwai ngim lah ban leh ei-ei ruh em. Ngi dei ban duwai ha U Biei ba ngin lah ban sngewthuh ia ka jingthmu bakongsan bad ia ki jynghmut kiba don ha ka lynnong

2 Ka Baibl :

Ka Baibl ka dei ban long ka tynrai jong ka jinghikai. Ha ka Baibl jong ngi lah ban ioh baroh ki jait jingiathuhkhana kiba iadei bad ka jingim jong ngi ki briew. U Nonghikai u dei ban pule bunsien ia ki bynta jong ka lynnong haduh ba un da ioh kem bad bat ia ka jynghmut kaba don ha ka

3 Ka por :

Ka por ban pynkhreh ka dei ban long la kumno-kumno shi taiew shwa. Hapoh kane ka taiew u dei ban

don ka por kaba thikna, lada lah, ban pyllait shi miet tang ban pynkhreh ia ka lynnong kaba u dei hikai. Ynda u la dep pynkhreh u dei ban pyrshang (practice) shwa ha iing ha shwa ban hikai ia ki khynnah. U dei ruh ban da mang lypa ia ka por ban hikai

4 Ka jaka :

Ka jaka pynkhreh ka dei ban long ha iing jong u lane ha kano-kano ka jaka kaba thikna. Ka kamra borabor ka dei ban long kaba jar-jar

5 Ka jingthmu :

Ka jingthmu jong ka lynnong kaba dei ban hikai ka dei ban long kaba tang kawei. Ki jinghikai baroh ki dei ban long kiba iadei bad kata ka jingthmu

6 Ka jingpynleit jngmut :

Hadien ba la dep hikai u nonghikai un kylli ha lade

- (a) A-iu Nga la hikai ia ki khynnah na kane ka lynnong?
- (b) Hato Nga la hikai ia ki shaphang U Jisu Khrist?
- (k) Hato don jingbakla ei-ei ha ka jinghikai ba Nga dei ban pynbeit?

Haba pynkhreh ia ka lynnong donkam ban pyrkhath de ia kine ki mat harum :

- 1 Pyrkhath bad phiah ia ki bynta baiapher ha ka lynnong
- 2 Donkam ka jinglam phrang ha ka lynnong
- 3 Sot tang ia ki mat kiba donkam ban hikai
- 4 Dei ban hikai ia ka lynnong kumba ka long

- 5 Ha ka lynnong dei ban don ka jingiasnoh ka jing-jia kawei hadien kawei pat
- 6 Ka lynnong kan iadei bad ka kynhun kita ki khynnah
- 7 Shna jingkylli kaba iadei bad ka kynhun kita ki khynnah
- 8 Kumno ban pynkut ia ka jingiathuhkhana (lynnong)

Ki Khynnah rit (Infants)

Nyngkong eh, haba u nonghikai u pynkhreh ia ka lynnong na ka bynta ban hikai ia ki khynnah rit u la dei ban pyrkhath ruh ia ka bor met, ka jinglong mynsiem bad ka bor pyrkhath jong ki. Katba ngi lah ban shem, ki khynnah rit ki sngewtynnat eh ia ka lynnong kaba don ka jingiathuhkhana. Namar kata, u nonghikai u la dei ban jied kaba kumno ka jingiathuhkhana u dei ban iathuh ia ki kaba lah ban tei ia ka jinglong mynsiem bad ka bor pyrkhath jong ki

Ha kano ka rukom yn pynkhreh ia ka lynnong na ka bynta ki Khynnah rit (Infants)?

Nuksa :

Nongrim: Markos 10:46-52 (Jingkdew Mt. 30:29-34: Lk. 18:35-43)

1 Pule bniah ia kane ka bynta ha ka Baibl:

Haba ong pule bniah ka mut ban pule janai ia kawei-pa-kawei ka dkhot, ka sentence bad ki kyntien kiba don ha kane ka bynta. Lada don jingeh, pyrshang ban pule biang sa shi sien ar sien haduh ban da sngewthuh. Hadien ba la lah pule bniah, sa wad ka iathuh a-iu ha kane ka lynnong

i Kaei ka jingjia?

U Jisu u pynkoit ia u briew uba matlah (ia ki khmat u Bartimaio)

ii Kiei ki briew kiba iadon hangta?

(1) U Jisu u nongpynkhiah uba khraw tam ia uba la phah da U Blei hi

(2) U Bartimaio—u briew uba matlah, u khun jong u Timaio

(3) Ki synran—ki nongbud U Jisu Khrist

(4) Ki paidbah—ki briew kiba bud ia U Jisu ban ioh-i ia ki kambah ba la leh da U

iii Hangno ka la jia?

Harud lynti sha ka nongbah Jerikho

iv Kaei ka jinghikai kaba mih na kane ka jingjia?

U Jisu u long U Blei uba donbor ban pynkoit ia ki jingpang baroh. Kawei-pa-kawei ka kambah kaba u la leh ka long ban iarap ia ngi ki briew

2 Ki kot iarap :

Haba u nonghikai u kwah ban tip kham bniah shaphang kane ka jingjia bad khnang ba un lah ban batai kham bha ia ki khynnah rit, donkam ban don ki kot iarap. U nonghikai u dei ban pule ia ki kot iarap ha iing haduh ban da sngewthuh. Um bit ban rah ia ki sha ka Skul pynpaw bad ban ieh noh ia ka Baibl. Haba u nonghikai u shim ia kane ka lynnong ban hikai u dei ban tip bha shaphang:

(a) **Ka Jerikho**—Ka don hangno? ka dei ka shnong kaba kumno? mano ba shong ha ka? bad kumta ter-ter. (u lah ban pule na ki commentary)

(b) **U Bartimaio**—Donkam ban tip bha shaphang jong u. U matlah ha kano ka rukom? Balei u khrong? Hato um don bahaiing-hasem? U long u briew uba kumno? bad kumta ter-ter

(k) **Ka jingiaid lynti U Jisu**—Dei ban sngewthuh ha kano ka por U Jisu u iaiaid lynti na Jerikho. Ha kano ka rukom ki paidbah ki bud ia U bad ka lynti ka long kaba kumno? bad kumta ter ter.

3 **Ka jingthmu :**

Ka jingiathuhkhana ka dei ban don la ka jong ka jingthmu. Kano-kano ka jingiathuhkhana kaba khlem don jingthmu, kam don jngmut ei-ei ruh em. Haba u nonghikai u jied ba ka jingthmu ha kane ka jingiathuhkhana ka long, 'U Jisu u long u lok jong ki briew baroh', kata ka mut, U Jisu u iarap ia ki briew baroh

4 **Ka jingsdang :**

Ia ka jingiathuhkhana lah ban sdang ha kano-kano ka rukom. Ka rukom kaba suk tam ban sdang ka long da kaba shu buh jingkylli. Kum ka nuksa, kylli ia ki khynnah la ki ju ioh-i ne em ia uba matlah ne uba dkoh. La kumno-kumno ka jubab jong ki kan long 'ho-oid'. Haba kumta, sdang nangta ia ka jingiathuhkhana

5 **Ka met bah :**

- (a) U Jisu u la wan poi sha Jerikho
- (b) U Jisu u la iakynduh ia u Bartimaio

6 **Ka jingkiew khet (climax) :**

- (a) U Jisu u pynkoit ia u Bartimaio

7 **Ka jingpyntrei kam :**

1 Lah ban shna jingrwai shaphang u Bartimaio bad ban pynrwai ia ki kkyannah

2 Pynlong ka jingleit jngoh ia kino-kino ki briew kiba pang

3 Ka jinganguh na ka bynta ki brierw kiba pang

4 Pynlong jingduwai na ka bynta ki para-khynnah kiba matlah

5 Pynleh drama ia ki khynnah shaphang u brierw uba matlah

Ki Khynnah pdeng (Primary) :

U nonghikai u dei ban buh jynghmut kum kiei ki jingiathukhana na ka Baibl kiba iarap ia ki khynnah ban pynskhem bad pynkhlaif ia ka jingshaniah jong ki ia ka jingdon ryngkat bad ka jingsumar U Blei. U dei ruh ban buh ha ka jingdynmaw ba don kiwei pat ki bynta badonkam kiba dei ban hikai bad kiba ki khynnah pdeng ki dang lah ban sngewthuh kum shaphang U Blei, U Jisu Khrist, ka Baibl bad ka Balang

Ka jingpynkhreh ia ka lynnong na ka bynta ki Khynnah pdeng (Primary)

Nuksa :

Nongrim: Ki Kam 3:1-12

1 Ka kot lyngkdop na ka bynta ban thoh ia ki bynta kiba donkam ha ka Baibl (Bible study notes). Thoh ha ka kot lyngkdop kumne harum:

- i U Petros bad u Ioannis ki dang ialeit kiew sha ka temple (3:1)
- ii U brierw uba dkoh u la thiah ha ka khyrdop jong ka templ ban pan jingai isyn-ei na ki brierw (3:2)
- iii U brierw uba dkoh u la ioh-i ia u Petros bad u Ioannis, u la pan ka jingai isyn-ei na ki (3:3)
- iv Ka jingktah kaba pynkhih ia u Petros (Peter's reaction) bad ka jingong jong u (3:4)
- v Ka jingkyrmen ban ioh ei-ei na ki (3:5)

- vi Ka jingpynkoit ha ka kyrteŋ U Jisu (3:6)
- vii U Petros u la shim ia u briew uba dkoh na ka kti bad u la pynieng ia u (3:7)
- viii U briew uba dkoh u la ieng bad iaid (3:8)
- ix U briew uba dkoh u la rung sha ka templ bad u da iaroh ia U Blei (3:9)
- x U paidbah u la dap da ka jingsngewphylla (3:10)

2 Ka kyrpong (background) :

- 1 Ka Templ, 2 Ka Khyrdop Ba-itynnat

3 Ka jingthmu (aim) :

Kaba pynshlur ban ai jingiarap ia kita ki bym ioh jingiarap

4 Ka jingpynleit jynmut (meditation) :

- 1 Hato Nga long uba iarap ia kito ki bym ioh iarap?
- 2 Iano Nga iarap lane iano Nga kyntait ban iarap?
- 3 Kumno bad mynno Nga iarap ia ki bym ioh jingiarap lane ia kiba pang?
- 4 Kaei nga la leh na ka bynta jong ki?

5 Ka dur jong ka jingiathuhkhana (story-scene) :

Shna ka dur kaba rit halor kitei ki mat ba la pyn-i haneng bad ai kyrteŋ halor kawei-pa-kawei ka dur. Kdew ia kawei ka dur kaba pyn-i ia ka pansngiat ne jingkieu khet (climax)

6. Ki dur : *Peit ha ki sla sha lyndet*

7. Paragraph :

Shim ia kawei-pa-kawei ka dur kaba la ai kyrteng bad thoh paragraph ia ka. lathuh bniah ia kata ka paragraph. Ruid laiñ haba phi la poi ha ka pansngiat ne jingkiew-khet (climax)

Nuksa :

i Ka templ :

Don katto-katne ki briew kiba ialum hapoh ka templ na ka bynta ban mane Blei bad duwai, don ruh kiwei pat kiba dang ia rung sha ka templ; bad shabar ka khyrdop don ki nongkhrong bad ki briew kiba anna ka longbriew

ii Ka Khyrdop Baitynnat :

U Petros bad u Ioannis ki dang iarung sha ka templ lyngba ka Khyrdop Ba-itynnat

iii U briew uba dkoh u pan jingai isyn-ei na u Petros bad u Ioannis :

U Petros bad u Ioannis ki iakynduh ia u briew uba dkoh ha ka khyrdop bad u pan ka jingai isyn-ei na ki


iv U Petros u pynkhiah ia u briew ha ka kyrteng U Jisu Khrist :


U Petros u pynkhiah ia u briew uba dkoh ha ka kyrteng U Jisu Khrist. U shim ia uta u briew na ka kti ban pynieng ia u

v U briew uba dkoh u rynsied da ka jingkmn :

Hadien ba u briew uba dkoh u la ioh koit u la rynsied da ka jingkmn kaba khraw bad u la iaroh ia U Blei, bad u la rung sha ka templ

PEIT IA
KI DUR JONG KA JINGIATHUHKHANA







vi U paidbah :

U paidbah u dap da ka jingsngewphylla shaphang kata ka jingjia

8 Thoh ka sentence ban pynkut ia ka jingiathuhkhana :

Nuksa, U Jisu Khrist u long uba la kloi ban iarap ia kito kiba pan ha ka kyrteng jong U

9 Jied kyrteng (title) na ka bynta katei ka jingiathuhkhana

Nuksa, 'U Nongkhong'

10 Ka jingpyntrei kam :

Shna kawei ka jingpyntrei kam na ka bynta ki khynnah ba kin leh hi da lade kumta kan iarap ia ki ban bat ia ka jingthmu jong ka jingiathuhkhana

Nuksa, Pynialeh drama ia kane ka jingiathuhkhana

11 Ka tiar trei (Visual aid) :

Lada ioh, pyndonkam da ka tiar trei na ka bynta katei ka jingiathuhkhana

Ki Khynnah heh (Junior) :

Haba hikai ia ki khynnah heh u nonghikai u dei ban pyrkhat ia kiei-kiei kiba don ha ka jingiathuhkhana la ki lah ne em ban pyniadei bad ka jinglong jingim jong ki. U dei ban tynjuh ia ki, ha kano-kano ka rukom, ia ka jinglong, jingkwah bad jingsngewthuh jong ki. Ki khynnah heh ki la kham iar ka jingsngewthuh ban ia ki khynnah pdeng. Haba ki la don ha kane ka ryta ki la don ruh ki jingeh ha ka jingsngewthuh jong ki bad ka long ka kam-ram u nonghikai kumno ban iarap ban weng ia kita ki jingeh na ki. Haba jied ia kano-kano ka lynnong u nonghikai u dei ban kynmaw ba ki khynnah heh ki don ha ka ryta kaba

bit tam ban pynsgewthuh janai ia ki ia ka jingshisha shaphang U Blei, U Jisu Khrist, U Mynsiem Bakhuid, ka Balang, ka Jingduwai, ka Jinglong Jingim bad ka Jinglong trai shnong, ka ling, bad ka Kam lalap

Ka jingpynkhreh ia ka lynnong na ka bynta ki Khynnah Heh (Junior):

Nuksa:

Nongrim: Lukas 10:25-37

1 Ka kot lyngdkop na ka bynta ban thoh ia ki bynta kiba donkam ha ka Baibl. Ban thoh ia ki mat ha ki dkhot kiba donkam:

i Ka jingiakren hapteng u 'riewsaid bad U Jisu (10:25-28)

ii U 'riewsaid u kylli uno u para-marjan jong nga (10:29)

iii U Jisu u jubab:

a K1 nongtuh ki la shoh ia u nongleit jingleit (10:30)

b U Lyngdoh (10:31)

k U Lebi (10:32)

d U Nong Samaria (10:33-35)

e U Jisu u la buh ka jingkylli (10:36)

g U 'riewsaid u la jubab (10:37a)

ng U Jisu u la hukum (10:37b)

2 Ka kyrpong (background):

i Ka surok na Jerusalem sha Jerikho

ii U Lyngdoh

iii U Lebi

iv U Nong Samaria

v U 'riewsaid

3 Ka jingthmu:

Ban tynjuh (to challenge) ia ki ban ieit ia ki para-marjan jong ki

4 Ka jingpynleit jyngmut:

Hato Nga long uba iarap? a lano Nga iarap lane Nga
kyntait hynnin ka sngi?
b Kumno Nga iarap?

5 Ka dur jong ka jingiathubkhana:

Shna dur kaba rit halor kitei ki mat ba la pyn-i haneng bad ai kyrteng halor kawei-pa-kawei ka dur. Kdew ia kawei ka dur kaba pyn-i ia ka pansngiat ne jingkiew khet (climax)

6 Ki dur: *Peit ha ki sla sha lyndet*

7 Paragraph:

Shim ia kawei-pa-kawei ka dur kaba la ai kyrteng bad thoh paragraph ia ka. lathuh lyngkot ia kata ka paragraph. Ruid laiñ haba phi la poi ha ka pansngiat ne jingkiew-khet

i U briew uba leit jingleit

U briew bad la ka jyngkit u hiar na Jerusalem sha Jerikho. Ka surok ka long kaba khohruh-khohram bad kaba kynjah. Ka surok ka don hapteng ki lum bad ki them

ii Ki nongtuh:

Ki nongtuh ki rieh ha khapmaw ha kyndong. Don napteng jong ki kiba rah da u dieng, don kiba rah da u maw bad don ruh kiba rah da ki tiar pynmysaw. Ki la shoh ia u ha ban da mysaw bad ki la lute ruh ia ki jingdon jong u

iii U Lyngdoh u la wan:

Hadien kata ka jingjia la wan hiar u lyngdoh na kata ka lynti. U la khmih ia uta u briew uba mysaw bad u la phet noh

iv U Lebi u la wan:

Hadien katto-katne por la wan sa u Lebi. U ruh u tangshu ioh-i ia uta u briew uba mynsaw u la peit bad u la kiar noh sharud lynti

v U Nong Samaria u la wan

Shen-shen la wan u Nong Samaria uba ring ia u kada shadien jong u. U pynkit ha u kada ia ka umphniang bad ka waiñ lem bad katto-katne ki jingbam kiba u pynkhreh na ka bynta ia lade ha lynti. Tangshu ioh-i ia u briew uba la mynsaw u la isyn-ei bad u la sumar ia u. Ynda la dep, u kit ia u halor u kada bad u buh ia u ha kawei ka iing-basa ban sumar ia u

vi Ka iing basa:

U Trai iing-basa u la pdiang sngewbha ban sumar ia uta u briew uba la mynsaw

8 Thoh ka sentence ban pynkut ia ka jingiathuhkhana:

Nuksa, U Jisu u long uba isyn-ei ia ki briew kiba shitom bad pang bad uba kloi ban iarap ia ki ha kano-kano ka por

9 Jied kyr teng na ka bynta katei ka jingiathuhkhana:

Nuksa, 'U Nong Samaria babha'

10 Ka jingpyntrei kam:

Shna kano-kano ka jingpyntrei kam bad ai lad ia ki khynnah ban leh ia kata khnang ba kin kynmaw bha ia ka jingiathuhkhana

Nuksa, Phah dro ha ka Black board ia kata ka jingjia lane pynialeh drama ia ki khynnah shaphang kata ka jingjia


PETT IA
KI DUR JONG KA JINGIATHUHKHANA



Unongleitt jingleit^①



Ki Nongtuh^②







Ki Samla dang khie (Intermediate):

Ban im ka jingim bakynja mynsiem, ki samla ki donkam ban tip ia U Blei. Ki donkam ban sngewthuh bha ia ka jingim kumba U Blei u la pynpaw ia ka ha ka Baibl. Man ka por ki samla ki lamwir jyngmut, ki lyngngoh, ki shah pynshoi, ki shah ialam bakla, bad shah tynjuh; hynrei ki kwah ban tip kaba kumno ka long ka jingim

U nonghikai ia ki samla dang khie u dei ban shai ha ka jyngmut ba ka jingthmu jong ka Christian Education ka long ban hikai ia ki samla ia ka jingshisha jong U Blei ha kata ka rukom ba kin tip ia U Jisu Khrist kat kum ka Jyngthoh Bakhuid, bad ban shah synshar ha U Mynsiem jong U ban pyndep ia ka jingthmu U Blei lyngba jong ki. Ki don lai tylli ki jingthmu bakongsan: (1) ban hikai bad ialam ia ki samla sha ka jingiadei bad U Jisu Khrist kum U Trai bad U Nongpyn-im; (2) ban pynbeit ia ki bad ban hikai ia ki kumta ba kin san ha ka jingngait bad jingim Khristan; (3) ban tynjuh ia ki bad ban ai mynsiem ia ki ban aiti ia la ka jingim ha U Blei kumta ba U Blei un pyndonkam ia ki

U nonghikai u dei ban ialam ia ki samla ban sngewthuh bad ban pyndonkam ia ka jingshisha ka Ktien-U-Blei ha ka jingiadei bad kiei-kiei baroh kiba ki sngewtynnat. U dei ruh ban pyrkhat ia ka jingim jong ki ha ka jingiadei bad ka imlang-sahlang

Ki samla kiba don ha kane ka ryta ki kham niewkor ia u nonghikai uba sngewkhia shaphang ki jingsngewtynnat jong ki ban ia u nonghikai uba tbit hynrei uba khlem jingsngew ia ki jingeh jong ki

Ka jingpyakhreh ia ka lynnong na ka bynta ki Samla dang khie (Intermediate):

Nuksa,

Nongrim: Lukas 10:30-37

Subject : 'U Nongsamaria babha'

1 Jinglamphrang:

Donkam ka ktien lamphrang shwa ban sdang ia ka jingiathuhkhana. Haba iathuh khana shaphang u Nongsamaria babba dei baniathuh thik kumba la thoh ha ka Baibi. Katba lah pyrshang ban pynlyngkot ia ka jingiathuhkhana

2 Jingiaphylliew Jyngmut (discussion):

Ka jingiaphylliew jyngmut ka long kaba donkam hadien tang shu dep iathuh khana. Ia kane lah ban leh ha kano-kano ka dur kat kum ka jingsngewbit jong u nonghikai. U Nonghikai u lah ruh ban pynkhreh lypa katto-katne ki jingkylli khnang ba ki samla kin ioh lad ban iatai nia halor kata ka subject kaba la hikai

3 Jingthmu:

'Ka jingshakri ia kiwei pat ki para-briew'

Nuksa: a) Ka kam jingpynkhiah

Ban ialam bad ban pynshlur ia ki samla shynrang bad kynthai ban shakri ia ki para-briew da kaba rung ha ka kam nongpynkhiah kum ki Doctor bad ki Nurse

b) Ka kam hikai

Ban pynrung ha ki samla ia ka mynsiem long nonghikai ba kumta kin lah ban hikai lem ia kiwei pat ki para-briew kiba dang dum bad ia kito ki bym pat ioh jinghikai ei-ei

k) Ka kam ban pyn-im ia ki para-mynsiem

Ban pynshlur bad ai mynsiem ia ki samla ban rung sha ka miostry na ka bynta ban tci ia ka kam U Bici ha kano-kano ka lyngkha kaba ki ibit bad sngewtynnai

4 Jingpynbeit Jyngmut: (Meditation):

Hadien ba la dep hikai, ki nonghikas kin kylli ha lade:

- a) A-iu nga la hikai ha ki samla shaphang kane ka subject?
- b) Hato nga la iathuh ne em shaphang U Jisu Khrist?
- k) Hato nga don jingbakla ne em ha ka jinghikai?

KA JINGSENG NE KA JINGPYNBEIT RYNTIH IA KI KLAS (ORGANISATION)

Haba bishar bniah ia ki khyannah naduh dang rit haduh ynda ki la shim ia ka jinglong samla, la shem ba ka jinglong bad jingim jong ki ka kiew irat na kawei ka kyrdan sha kawei pat ha kajuha ka dur bad ka jingdonkam kum ha ka (a) jinglong bakynja met (physical), ka bor pyrkhat (mental), ka jingladei ha ka imlang-sahlang (social), ka jingangew jong ki (emotional), bad ka jinglong mynsiem (spiritual). Da kaba lah ban bishar ia kitei ki kyrdan ka jingroi ha ka jingim jong ki, lah ban seng ia ka Skul Pynpaw ha kata ka dur kaba iadei bad ka jingim bad jingdonkam jong ki kat kum ki kynhun (groups)

Ka jingbuh kyrdan

Ki nonghikai Khristan ki shem ba ka jingbuh kyrdan ha ka Skul Pynpaw ka long kaba kordor bad ba myntoi sha-katdei. Kane ka iarap ia ki Khristan ban san ka jing-sngewthuh ia U Jisu Khrist katba ki nang kiew na kawei ka kyrdan sha kawei pat. Ka Skul Pynpaw ka iarap ban pynbiang ia ka jingdonkam jong ki kaba iadei bad ka jingim Khristan bad ka a bor ruh ban sngewthuh kham bha ia U Nongpyn-im jong ki

Ha ki Skul Paidbah la buh kyrdan ia ki khyannah kat kum ka bor sngewthuh jong ki. Kane kam long kaba biang na ka bynta ka Skul Pynpaw. Ha ka Skul Pynpaw la buh kyrdan kat kum ka ryta bad ka jinglong jingim jong

ki khynnah. Ki kyrdan ki long kat kum ki snem baiapher kumne : 3-5; 6-8; 9-11; 12-15; 16-18. etc. Ia ki kyrdan ne klas yn phiah kat kum kitei ki ryta ba la pyn-i haneng. Ka jingdon ki khynnah ha kawei-kawei ka klas ka shong eh kat kum ka jingwan ki khynnah sha kata ka Skul Pynpaw bad ka jingdon ki nonghikai ha kata ka Balang. Ki kyrdan ba la pynkhreh da ka ISSU ki long: (1) Infants, (2) Primary, (3) Junior, (4) Intermediate, bad (5) Senior. Hynrei na ka bynta ki Skul Pynpaw ha Nongkyndong ki bym lah ban ioh nonghikai, ka ISSU ka la pynkhreh ki lynnong na ka bynta ki lai tylli ki kyrdan : (a) ki khynnah, (b) ki samla, bad (k) kiba la san

Ka jingheh jong ki klas :

Kane ka shong eh ha ka jingwan jong ki khynnah sha ki klas bad ka jingdon ki nonghikai. Hynrei ka klas kaba paka eh ka long phra (8) ngut shi klas. Bunsien namar kano-kano ka daw la pynbor ia ngi ban pynlong ka klas kaba heh, kham bun ki khynnah ban ia kaba la buh pud haneng. Khnang ba u nonghikai un lah ban iarap ia uwei-pa-uwei u khynnah shimet-shimet bad ba un lah ban ioh jinghun na ka klas jong u, kan bha shibun ban nym buh palat la kumno-kumno shiphew (10) ngut ha kawei-kawei ka klas

Ka kyrdan khyllung (the Cradle Roll)

Ki khyllung kiba don ka ryta hapteng 0-3 snem. Kine ki long ki khyllung ki bym pat long ban leit sha ka skul. Hynrei ki khyllung kiba kum kitei kiba kha na ki kmie ki kpa kiba long Khristan ki lah ban pynrung ia ki ha ka Skul Pynpaw jong ka Balang. Ka dei ka kam-ram jong ka Skul Pynpaw ban pdiang ia ki naduh dangrit khnang ban pynmlien ia ki ba ynda ki la kham san kin sngewtynnai bad ieit ban leit sha ka Skul Pynpaw. Lada lah, dei ban buh kyrpang kawei ka bui (register) na ka bynta jong ki bad dei ruh ban thung uwei u Secretary na ka bynta jong ki. Lada ioh, u Secretary u dei ban long napdeng ki samla kynthei kiba ieit bad kiba sngewtynnai bha ia ki khyllung

Ka kyrdan Khynnah rit (Infants)

Ki khynnah rit kiba don ka ryta hapteng 3-5 snem. Ka jingsan ka met jong ki khynnah kiba don ha kine ki snem ka long kaba stet katta-katta ba kumta kine ki khynnah ki don kam ka jingpynkylla bad jingpynkynriah kaba manla ka teng. Namar kata, kum ia ki dei ban pyniakhlad noh wak na ka Skul Pynpaw baroh kawei bad ban buh ia ki ha kawei ka kamra kaba kyrpang. Kin don la ka jong ka lyngkrang (program) ha kaba ka jingtrei jong ki kin long borabor da kaba pyndonkam da ki tiar. Ki nongialam ne ki nonghikai jong ki khynnah rit ki dei ban long ki briew kiba la shemphang bha namar kine ki khynnah ki donkam ka jingsngewthuh bad ka jingsharai kaba kyrpang

Ka kyrdan Khynnah pdeng (primary)

Ki khynnah pdeng kiba don ka ryta hapteng 6-8 snem. Ki khynnah kiba dang don ha kane ka ryta ruh ki dang rit tangba ki la lah ban iashim bynta ha ka program kaba donkam ia ka bor pyrkhath (intelligent part) jong ki. Ka met jong ki ka dang ia kyrsei bad ki long kiba dap da ka bor jingkhilaiñ (full of energy). Haba shna ka program na ka bynta ka kyrdan Primary donkam ban da pyrkhath artat ia ka jinglong jingim jong ki. Ki nonghikai ki dei ban lah ban sngewthuh ia ki khynnah kiba don ha kane ka ryta. Ka kyrdan primary ka long ka kyrdan kaba bit ban ai jinghikai (training) ia ki nonghikai samla kiba dang sdang hikai

Ka kyrdan Khynnah heb (Junior)

Ki khynnah heb kiba ka ryta hapteng 9-11. Ha kine ki ryta ka jingsan ha ka met jong ki ka la sdang duna, hynrei ka jingsan ka bor pyrkhath ka kloï bha. Ka Skul Pynpaw ka dei ban pynbiang ia ki jingdonkam ki khynnah kiba don ha kane ka kyrdan. Ki nonghikai lane ki nongialam kiba dei ia kane ka kyrdan ki dei ban long u briew uba sngewthuh ia ki khynnah kiba don ha kane ka ryta bad u dei ruh ban lah ban synshar (manage) ia ki. Ngi ai jingmut ba ki nonghikai ia kane ka kyrdan ki dei ban long u briew uba kham rangbah ban ia u nonghikai uba hikai ia ka kyrdan primary

Ka kyrdan Samla dang khie (Intermediate)

Ki samla dang khie kiba don ka ryta hapteng 12-15. Kane ka long ka kyrdan kaba shitom eh ban trei. Ka lad kaba bha tam ban pyniadei ia ki ka long da kaba iatrei ryngkat bad ki. Ym dei ban leh ia ki kum ia ki khynnah rit. Ki nonghikai bad ki nongialam ki dei ban wad ban iatrei ryngkat bad ki lada shimet-shimet lane ha ka kynhun. Ki nongtrei kham tam ki nonghikai ki dei ban sngewthuh ia ka jinglong ki samla dang khie, ia ki jingeh bad ki jingdonkam jong ki

Ka kyrdan Samla lud (Senior)

Ki samla lud kiba don ka ryta hapteng 16-18. Ka jingkhie samla ka la kut haba la don 16 snem. Kim don jingsngewtynn timer shuh ban wan sha ka Skul Pynpaw. Kumta ka bha ban don noh la ka jong ka kynhun kaba iakhlad na ka Skul Pynpaw

Ka jingbuh kyrdan kat kum ka ryta

(ka jingpynbeit thymmai, lada lah ban pyntrei kam)

1	Ka kyrdan Khyllung (Cradle Roll)	0 - 3 snem
2	Ka kyrdan Khynnah rit (Infants)	3 - 5 snem
3	Ka kyrdan Khynnah pdeng (Primary)	6 - 8 snem
4	Ka kyrdan Khynnah leh (Junior)	9 -11 snem
5	Ka kyrdan Samla dang khie (Intermediate)	12 -15 snem
6	Ka kyrdan Samla lud (Senior)	16 -18 snem
7	Ka kyrdan Samla pdeng	19 -21 snem
8	Ka kyrdan Samla rangbah	22 -24 snem
9	Ka kyrdan Rangbah	25 snem shalo ^r

KI NONGKIT KAM BAD KI COMMITTEE

Haduh mynta dang don shibun ki Balang hapoh ka Synod jong ngi ki bym pat sngewthuh shaphang ki nongkit kam bad ia ka jingrei jong ki ha ka Skul Pynpaw. Don ruh ki Balang ki bym don committee na ka bynta ka Skul Pynpaw

Na ka bynta ka jingiaid ryntih ki Skul Pynpaw baroh hapoh ka Synod jong ngi, ngin shu pyn-i katto-katne ki nongkit kam kiba iadei bad ka Skul Pynpaw bad ia ka jingrei jong ki ha ki bynta bapher-bapher. Ngin pyn-i ruh katto-katne ki committee kiba donkam na ka bynta ka Skul Pynpaw bad ha kano ka rukom yn pynlong ia ki

Ki Nongkit kam Skul Pynpaw :

- 1 Superintendent
- 2 Asstt. Superintendent
- 3 Secretary
- 4 Assistant Secretary
- 5 Ki Nongialam (leader) ha ki department
- 6 Ki nonghikai klas
- 7 Treasurer
- 8 Librarian

Ki Committee Skul Pynpaw :

- 1 Ka Executive Committee
- 2 General Committee

Ka rukom jied bad ka por trei jong ki nongkit kam:

Lehse kan bha shibun ba ka Committee Balang kan jied hi ia u Superintendent, Asstt. Supdt., Secretary, Asstt. Secy. Treasurer bad Librarian. Ki briew kiba bat ia kitei ki kam ki dei la kumno-kumno ban long ki briew kiba la rangbah bad kiba ieit ia ka Skul Pynpaw. Ia ka por jingtrei kam (term) jong ki ym lah ban buh pud namar ka shong eh ha ka jingdon ki nongkit kam ha kata ka Balang. Lada lah, kan bha shibun ban pynthymmai ia ki nongkit kam man la ka snem

Ia ki nongialam (leaders) bad ki nonghikai dei ban jied da ka Executive Committee. Ka Executive Committee ka dei ban khmih bniah ba ka jingjied nonghikai kan iadei bad ka kyrdan kaba ki hikai. Lada lah, dei ban don ka jingpyrshang (trial) ia uwei-pa-uwei u nonghikai la u iadei ne em bad kata ka klas kaba u hikai. Kane ka jingpyrshang ka dei ban long ym duna ia ka 3 bnai. Lada la ibit, dei ban pynskhem ia u ha kata ka klas; bad lada ym ibit, dei ban iapli para-nonghikai lane buh pli noh da uwei pat

Ka rukom jied ia ki dkhot ha ki Committee

- 1 Ka Executive Committee-- Ki dkhot kin long ki nongkit kam (office bearers) bad ki nongialam (leaders) jong ki deptt.
- 2 Ka General Committee-- Ki dkhot ka Executive Committee bad ki Nonghikai Skul Pynpaw baroh.

U Superintendent ka Skul Pynpaw

Kawei-pa-kawei ka Skul Pynpaw ha ka Balang ka dei ban don u Superintendent. U Superintendent ha ka Skul Pynpaw ba la buh kyrdan u dei ban long u Pastor, lane u Probationary Pastor, lane u Tymmen Basan, lane uno-uno u Rangbah Balang uba don ka jingieit bad jingsngewtynnat ia ka Skul Pynpaw

Kum u Headmaster jong ka skul sngi, u Superintendent u dei ban don ka mynsiem kitkhlieh bad ka mynsiem aiti ia lade na ka bynta ban pyniaid shaphang ia ka Skul Pynpaw

Ki kam bakongsan jong u Superintendent ki long kumne harum :

- 1 ban seng (organise) ia ka Skul Pynpaw ha ki bun ki Pnat (Department). Un shim ha lade ia ka jynghit-khlieh ban pynroi bad pyniaid shaphrang ia ka Skul Pynpaw
- 2 ban iatrei ryngkat bad u Secretary ka Skul Pynpaw ha kaba pynbiang ia ki jingdonkam baroh ha ki department kiba iapher. Kin shna ka plan kaba thymmai na kawei ka por sha kawei pat kaba iadei bad ki jingdawa ha kawei-pa-kawei ka department
- 3 ryngkat bad u Secretary u Superintendent un peit ba kawei-pa-kawei ka department ba la buh kyrdan kan iadei bad ka ryta, ka jingsngewthuh bad ka jinglong jong ki khynnah. Haba kyntiew klas ia ki khynnah na kawei ka department sha kawei pat ki dei ban iatrei lang bad ki nongialam jong kata ka klas ba kumta kin lah ban kyntiew ia ki khynnah ha ka rukom kaba beit bad ryntih. Haba kyntiew klas ia ki khynnah dei ban sngewthuh ia ka ryta, ka bor sngewthuh bad ia ka jinglong ki khynnah. Da kaba leh kumne kan pynshlur ia ki khynnah ban wan sha ka Skul Pynpaw.
- 4 ban iasyllok bad ki nongialam jong ki department ia kino-kino ki jingeh bad jingdonkam ha ki department jong ki
- 5 ban pyniaid ia ki Committee Skul Pynpaw. Ryngkat bad u Secretary un pyntrei kam ia ki rai ki Committee baroh
- 6 ban leit jngoh katto-katne sien ia ki department. U lah ban leit jngoh ha kano-kano ka por kat kum ka jingdawa jong ka kam

- 7 ban peit ia ka jingwan ryntih bad tista jong ki khynnah skul bad ki nonghikai de, bad ban peit ruh ia ka jinglong ryntih jong ka Skul Pynpaw baroh kawei
- 8 ban pyrshang ban sngewthuh bad tip ia ki rukom-hikai (methods), jingpynkhreh ia ka lynnong (lesson preparation), jinglong ki khynnah (psychology), bad ia ki nongrim (principles) jong ka jinghikai niam ha ka Skul Pynpaw. U Superintendent u lah ban leh ia kane da kaba u pule ia ka Teacher Training Course, Diploma jong ka I.S.S.U. lane da kaba u shu pule ia ki kot kiba pynmih da katei ka seng na ka bynta ka Skul Pynpaw na kawei ka por sha kawei pat. Haba u la sngewthuh bad tip ia lade kumta u la lah ban iarap bad ai-buit lem ia ki nonghikai bad nongialam ha ki department jong ki
- 9 ryngkat bad u Secretary un pynbeit ban don ki jingialang bakyrpang na ka bynta ki nongialam baroh jong ka Skul Pynpaw. Ha ki jingialang ki nongialam kin iaphylliew jyngmut iwei-ia-iwei pat ia ki jingeh bad jingdonkam baroh ha ki department jong ki
- 10 lada lah, un pynbeit ban ai jinghikai (training) ia ki nonghikai bad ia ki nongialam. Un pynbeit ruh bad ki nongialam jong ki department ba kin don la ki Klas-pynkhreh (preparation Class) na ka bynta ki nonghikai jong ki department jong ki
- 11 ban ialam ia ka jingmane-Blei ha ling-mane lane ha ki department kiba u don
- 12 ban iapynbeit bad u Secretary na ka bynta ki nongshim bynta ha ka jingpule na ka ktien-U-Blei bad duwai, ki nongduwai na ka bynta ki jingainguh, ki jingrwai kiba iadei bad ka jingiaseng, ki nongshim bynta ha ka jingpynspel ia ka Kot-Nongialam bad kiwei-kiwei ki kot niam, ki nongpdiang jingainguh, nonglam jingrwai bad bun kiwei-kiwei kiba kum kita

- 13 ban iasyllok bad ki iing Khristan ba kumta ki kmie ki kpa kin phah ia la ki khun ban wan tista sha ka Skul Pynpaw da kaba pyn-i nuksa da lade hi

U Secretary ka Skul Pynpaw

Kawei-pa-kawei ka Skul Pynpaw ka dei ruh ban don u Secretary (Saiñ-pyniar). U Secretary u long kum u shabi uba plie bad uba khang ia ki jingdonkam baroh ha ka Skul Pynpaw

Ki kam u Secretary

- 1 U Secretary, da ka jingiasngewthuh lang bad Superintendent, u lum ia ka Committee ha kano-kano ka por haba ka kam ka dawa
- 2 Dei ma u uba pyntrei kam mardor ia ki rai jong ki Committee baroh
- 3 U thoh kaiphot ha ki register ia ka jingwan ki brieve ha ki klas baroh
- 4 U nongkhmih ia ki tiar baroh kiba donkam ha Skul Pynpaw

U Treasurer ka Skul Pynyaw

U Treasurer u dei u nongkynshew ia ki jingainguh baroh kiba mih na ka Skul Pynpaw man la ka Sngi-U-Blei. U dei ban don ka Cash Book bad u dei ban thoh ia ka jingainguh jong ki department baroh ha la ka jong ka jong. U Treasurer u dei ruh ban siew ia ki jinglut baroh ha ka Skul Pynpaw lyngba u Secretary

U Librarian ka Skul Pynpaw

U Librarian u dei u nongsumar ia ki kot ki sla bad ia ki tiar ki tiar baroh kiba don ha ka iing-buhkot (library). La khmih-lynti ba kawei-pa-kawei ka Skul Pynpaw ha ki

Balang baroh ka dei ban don ka library. Ha kane ka library kin buh ia ki kot baroh kiba iadei bad ka Skul Pynpaw. Dei ban don ki kot na ka bynta ki nonghikai bad dei ruh ban don na ka bynta ki nongpule. U Librarian u dei ban don ka stock book bad ka issue register na ka bynta ban kyntiew ia ki kot bad na ka bynta ban sam ia ki sha ki nongpule

U Leader ha ki department

U Leader u dei u nongkhmih ia kawer ka klas kaba don shibun ki department. Kum ka nuksa, haba ka klas Infants ka don hynriew tylli ki klas, kata ka mut, ka don hynriew tylli ki department. Na ka bynta kine hynriew tylli ki department dei ban don uwei u nongialam (leader)

Ka kam u leader ka long ban pynbeit lypa ia ki nongpule sdang bad ia ka bynta ba dei ban pule, bad ia ki jingrwai na ka bynta kata ka klas kaba u dei khmih

Ki nonghikai

Ka kam hikar ka long ka kam kaba khraw tam na ki kam baroh katba ngi lah ban shem ha ka jingim jong nei ki briew. Ka jingbha bad ka jingsniew ki briew ka mih na u soh ka jinghikai. Ki nonghikai kiba bha ki pynbha ia ki briew, hynrei ki nonghikai kiba bakla ki ialam bakla ia ki briew. Ka jingbha bad ka jingsniew ki nonghikai lah ban sngewthuh na ka jinglong jingim jong ki, na ka dohnud kaba ki don bad na ka jingthnu jong ki kaba don ha lyndet jong kata ka jinghikai. Kane ka long kaba shisha kham tam ia ki nonghikai niam. Kham bunsien ki nonghikai niam kiba shaniah ha la ka jong ka jingstad ki ialam bakla ia ki briew. Hynrei ki nonghikai niam kiba shaniah ia lade ha ka jingialam U Blei ki kyntiew ia ka jinglong mynsien bad ia ka jingim bariewblei jong ki briew. Ki briew kiba stad shisha ki dei ki briew kiba tip ia U Blei nyngkong nangta sa ia ki para-briew

Ki nonghikai Skul Pynpaw, ha kawer pat ka liang, ki don ka bynta kaba khraw ban hikai ia ki khun jong U Blei. Ka jingkhlaif bad ka jingtlot ka Skul Pynpaw ka shong eh ha ki nonghikai jong ka. Ka Skul Pynpaw ka lah ban don u Superintendent lane u Secretary uba khlaif hynrei lada ki nonghikai ki long kiba tlot, kam lah ban kiew shaphrang. Da kumwei pat, wat lada u Superintendent lane u Secretary u long uba tlot hynrei haba ki nonghikai ki long kiba khlaif, ka Skul Pynpaw kan kiew arsut

Kiba kumno dei ban long ki nonghikai:

- 1 Nyngkong eh, ki nonghikai ki dei ban long kiba sngew ia ka jingkhoh U Blei ryngkat bad ka jingiasyllok bad kyntu jong ngi ki briew. Ki dei ruh la kumno-kumno ban long kiba la long riewdkhot
- 2 Haba ki nonghikai ki la don ka jingktah ha ka mynsiem ban hikai ki long kiba la klof ban pynkhreh ia ki lynnong shwa ban hikai ia ki khynnab
- 3 Ki nonghikai ki dei ban long kiba la pynbit ia lade ha kane ka kam, lane haba kim loh kum kata ka lad, ki dei ban long kiba la klof ban aiti ia lade ha kane ka kam kat kum ka sap bad ka jingstad kaba U Blei u la ai ha ki
- 4 Ka klas kaba ki nonghikai kin hikai ka dei ban long kat kum ka jingmad (taste) jong ki ia kata ka klas ryngkat bad ka jinglong ka jingim jong ki lem bad ka kyrdan kaba ki don kaba iader bad kata ka klas
- 5 Ki dei ban long kiba wan tista, kiba poi ha ka por kaba biang (la kumno-kumno kin poi 10 minutes shwa ka por ban pynbiang ia ki jingdonkam baroh ha ka klas)
- 6 Ki dei ban long kiba kitkhia ia la ki jong ki nong-pule, lada donkam, ban leit wad ia ki haba ki pep klas kham tam ban leit jngoh haba ki don hapdeng ka jingpang

- 7 La kumno-kumno ki nonghikai ki dei ban tip ia ka jinglong (psychology) jong ki khynnah bad ia ki rukom hikai (methods of teaching)
- 8 Ki dei ban long kiba smat ban wan sha ka jingiaseng
- 9 Kiba iatrei lang bad ki para-nonghikai bad kiba kohnguh ia ka jingialam bad jingpyniaid jong kito kiba kitkhlieh ia ka kam
- 10 Kiba pynkhreh bha ia ka lynnong kaba ki dei ban hikai (ki nonghikai ki dei ban iathuh hok lada don kano-kano ka taiew kaba kim ioh por ban pynkhreh kumta ba ki nongialam jong ki kin iarap hikai ia ka klas jong ki na ka bynta kata ka taiew kaba ki khlem pynkhreh)
- 11 Katba lah, ki nonghikai ki dei ban tip kyrteng kloil an ia ki khynnah baroh kiba don ha ka klas jong ki
- 12 Khatduh eh, baroh ki nonghikai ki dei ban tip bha ia ka Baibl

KA JINGIASENG KYRPANG KA SKUL PYNPAW IIA LA KA JONG KA JONG KA KLAS

La shem ba haduh mynta ki Balang ha nongkyn-dong kim pat lah ban pynlong ka jingiaseng kyrpang ha kawei-pa-kawei ka klas ha ka por long Skul Pynpaw. Ka jingiaseng Skul Pynpaw jong ki ka long beit tang ha ling-mane naduh basdang haduh ynda wat. Ka rukom pyniaid jingiaseng Skul Pynpaw jong ki ka long ba hadien ynda la dep pule ia ka Baibl bad duwai ki ai kawei ka jingrwai bad nangta ki iapra sha la ki jong ki jong ki klas—don kiba ialong klas ha ling-mane bad don ruh kiba ialong ha skul kaba hajan ling-mane. Ka por pynlong klas ka long hapdeng 30-40 minutes—kawei ka Skul Pynpaw ka iapher na kawei pat—ha la ka jong ka jong ka rukom pyniaid kat kum ka jingsngew-bit ka Balang. Dei tang ha ka por long klas ba ki iapra sha la ki jong ki jong ki klas hynrei ia ki jing-donkam baroh ki pyndep ha ling-mane

Ha ki nongbah bad ki shnong kiba la shai, ka rukom pyniaid Skul Pynpaw ka kham pher na ki nong-kyndong. Hynrei ha ki nongbah ruh don kiba pyniaid la ka jong ka jong ka rukom. Na ka bynta ka jing-myntoi ki Skul Pynpaw baroh ha ka ri, ngin pyn-i harum katto-katne ki rukom pyniaid jingiaseng jong ki Skul Pynpaw kiba don ha ki nongbah;

1 Khynnah rit (Infants)

- 1 jingrwai — da u Nongialam
(ka kot jingrwai ka lah ban long
kaba heh ne ka kot jingrwai rit
kaba la shon kyrpang na ka bynta
jong ki)
- 2 Pule na ka Baibl — (Pule 1-2 dkhot bad ong ia ki ban
bad duwai bud ia u nongialam. Dei ban
duwai lyngkot (1 minute) ba kin
lah ban bud bad sngewthuh ia
kaba ki pan
- 3 Sngi kha ki khynnah — I nonghikai in duwai na ka bynta
Infants ino-ino i khynnah iba wan klas
ha ka sngi kha jong i
- 4 Jingainguh — Haba pdiang jingainguh, shah ia
ki khynnah ban iaid hi sha ka
miej ban buh ka jingainguh jong
ki katba ki don. Ki khynnah
ki kmen ban ioh ai ei-ei
- 5 Jingrwai —
- 6 Jingpyntip — (shaphang ka jingpyn-i dur, jing-
hikai jingrwai thymmai lane kino-
kino ki jingphylla kiba pynsngew-
bha ia ki khynnah)

- 7 Jingiathuhkhana — Pule ia ka lynnong ha ka jing-sngewkyntang, lada lah, ha ka sur Sngi-U-Blei bad da iathuh ruh ia ka bynta ba phi la jied ban iathuh khana. Ka jingiathuhkhana kan nym palat ia ka 10 minutes

8 Jingrwai bad pynwai—

II Khynnah pdeng (Primary)

- 1 jingrwai — Kumba leh ia ki infants
- 2 Pule na ka Baibl bad duwai — Kumba leh ia ki khynnah infants
- 3 Jingspel dkhoh ne jing-hikai jingrwai thym-mai — da i Nongialam
- 4 Sngi kha ki khynnah Primary — Kumba leh ia ki khynnah infants
- 5 Jingainguh — Kumba leh ia ki khynnah infants
- 6 Jingrwai
- 7 Jingpyntip — Shaphang ka jinghikai jingrwai bad jingspel dkhoh
- 8 Jingiathuhkhana — Kumba 15 minutes ei-ei
- 9 Jingrwai bad pynwai— (Dei ban ong ia ki ban iat don-akor kumta ba kin sngewthuh ia ka jingkyntang ka jingshakri Blei jong ki.)

N.B.

Ka jaka long Skul Pynpaw : Na ka bynta ki khynnah infants bad primary, ka jaka long skul ka dei ban long kaba itynnat. Lada lah, dei ban pynriam pher ia ka da kaba buh ki jaiñsiang meij, u khiew syntiew halor meij, ki dur kiba pher-bapher, bad kiwei-kiwei

III Khynnah leh (Junior)

1 jingrwai -- Kumba leh ia ki khynnah primary

2 Pule na ka Barbl
bad duwai - Kumba leh ia ki khynnah primary.
(Dei ban pule ia kano-kano ka bynta kaba la thikna bha—ym dei ban don jingartatien. Dei ban da pynkhreh lypa. Ki jingduwai ki dei ban long kiba synlar—khlem da ot shrong ot shrup. Lah ban kham pynslem khyndiat tangba ym dei ban pynslem than. Haba duwai ym dei ban iathuh khana ia U Blei

3 Jingspel dkhoh ne da i Nongialam
jinghikai jingrwai

4 Jingainguh -- Da kaba shu pdiang (rwai bad duwai)

5 Jingrwai

6 Jingpyntip -- Kumba leh ha Primary klas

7 Jingiathuhkhana -- Kumba leh ha Primary klas.

8 Jingrwai bad pynwai

N.B.


Ha ki khynnah Junior ki bynta baroh naduh bsdang haduh ban da kut ka jingiaseng ki long ka jingshakri Blei Namar kata, ym dei ban don jingbakla ei-ei ruh em

IV Samla dang khie (Intermediate)

- 1 Jingrwai - Kumba leh ha ka klas Junior
- 2 Pule na ka Baibl bad dawar - Lah ban jied na pdeng ki khyn-
nah lada don kiba ibit ban shim
bynta ha kane ka kam Lada ym
don, ki nonghikai kin leh hi
- 3 Jinganguh --- Kumba leh ha ka Junior klas
- 4 Jingrwai
- 5 Jingpyntip --- Kumba leh ha ka Junior klas
- 6 Jingiakren -- Donkam ka jingraphyitew Jyng-
mut (discussion) bad kyih jing-
kyih. Ia ki jingkyih kiba ym lah
ban jubab dei ban iathuh hok
ba ym tip--ym dei ban ten ne
pyngkyllan da kumne bad kumtar
7. Jingrwai bad pynwai

N.B.

Na ka bynta ki khynnah Intermediate kano-kano kaba ngi leh ha ka Skul Pynpaw naduh kaba sdang haduh ban da wai ka dei ban don ka jingawkyntang bad kaba da shina



Ki kot ba pynmih da u juh u nongthoh

- | | |
|---|-----------|
| 1. Ki Biria U 'Peh-Sylli (Part I) | 60 peisa |
| 2. Ki Biria U 'Peh-Sylli (Part II) | 75 peisa |
| 3. Ki Biria U 'Peh-Sylli (Part I, II, III) | Rs. 2.50 |
| 4. Ki Nuxsa ha ka jingim ba dei ban phikir | Rs. 2.00 |
| 5. Ka Dienshonhi (A Khasi-Khasi Dictionary) | Rs. 12.00 |
| 6. La Pyndep | Re. 1.00 |
| 7. Ki Nonghikai bad ka Skul Pynpaw | Rs. 2.00 |
| 8. A Khasi Glossary | 50 paise |

Ki kot ki ban sa mih shen

1. The Preparation for the Gospel in Traditional Khasi belief (in English)
2. Ka Dak ha u Maw
(A study on the Khasi script)
3. Cultural and religious background of the Tribal People of North East India
4. Kiba kumno ha ka Baibl

Lah ban toh ia kitei ki kot na:

1. Baroh ki dukan die kot kiba kham pawkhamat.
2. U nongthoh,
Malki Pdeng Shnong,
Shillong-1.